

四庫全書

史部

欽定四庫全書

浙江通志卷一百六十一

人物一

名臣四

台州府

宋

陳公輔

宋史本傳字國佐臨海人政和三年上舍及第調平江府教授朱勔方嬖倖當官者奴事

之公輔絕不與交勔有兄喪諸生欲往弔公輔不予告勔不悅諷權要移越州累遷權應天府少尹

欽定四庫全書

卷一百六十一

除祕書郎擢右司諫論蔡京父子懷奸誤國又奏朱勔罪惡時有指公輔為李綱之黨鼓倡士庶伏闕者公輔自列因辭位後陳三事語觸時宰遂斥監全州稅高宗即位召還除吏部員外郎疏言今日之禍實由公卿大夫無氣節忠義非王安石學術壞之即議者謂安石政事雖不善學術尚可取臣謂政事害人才學術害人心馮道事四姓八君安石乃曰道最善避難以存身使公卿大夫皆師安石之言宜其無氣節忠義也復授左司諫感知遇益罄忠鯁言正心在務學治國在用入朝廷之禍在朋黨仍乞增輪對官時有詔將駐蹕建康公輔上疏陳攻守之策遷尚書禮部侍郎請祠以薨猷閣待制提舉太平觀卒贈大中大夫

吳芾

朱子吳芾墓碑字明可僊居人紹興二年進士始為樂清尉遷祕書正字泰檜與芾有舊欲芾

附之而終不能得諷言者罷之檜死乃知處州以薦除監察御史兩淮戰不利廷臣爭陳退避之計芾獨奮然曰今日之事進為上策退為無策若誤聽此大事去矣上至建康芾又言宜駐蹕以繫天下心時朝廷上下因循芾言欲求死節之士於倉卒之時不若進剛直之臣於閒暇之日去歲兩淮失守望風奔潰此秦檜塞言路推士氣之餘毒也反其道則見危授命者有人矣薦周操陳良翰良佑為御史皆以諫顯俄以集英殿修撰知婺州改知紹興鏡湖廢不治歲大饑芾為民請賑并發米募民為役民甚利之除刑部侍郎充兩浙安撫使以龍圖閣直學士致仕

陳良翰

宋史本傳字邦彥臨海人紹興五年進士知温州瑞安縣吳芾薦為監察御史孝宗初除

右正言金移書求故疆良翰言中原皆吾故土況唐鄧淮泗又金渝盟後以兵取之安得以故疆為

言而歸之湯思退主遣小使盧仲賢李栻良翰言仲賢輕儇無恥栻自北來難信又言廟堂督府議論不同邊奏上聞皆陽唯諾而陰沮敗之萬一失事機督府安得獨任其責上矍然稱善成李栻不敢涉淮良翰奏奪其官仲賢輒許金人疆土歲幣而還上怒欲誅之宰相請得免遂以胡昉楊由義為審議官與敵議四郡不合困辱而歸思退尚執前論正言尹穡附思退撼督府良翰為左司諫疏論思退姦邪誤國宜早罷黜孝宗曰思退前議固失然朕愛其警敏冀可效卿其置之良翰曰宰相縱無全才寧取樸實緩急猶可倚賴思退庸狡小黠大癡將誤國且警敏二字恐非明主卜相之法既退以語同列穡勃然變色明日亦請對遂罷良翰言職兩淮既撤備金大入孝宗始深悔太學生數百人伏闕乞召用良翰而斬思退等思退由是始敗良翰除右諫議大夫進給事中以敷文閣待

制提舉太平興國宮召為太子詹事召對選德殿
俾任陳今日所未至者良翰上疏曰仁德治之本
功利治之效務本而效自至今承天意結民心任
賢能退小人擇將帥收軍情擇監司吏久任皆行
之有未至誠能革此八弊則仁德無累功利自致
矣上嘉歎詔兼侍講未幾以疾告老卒光宗立特
謚獻

肅

陳騤

宋史本傳字叔進臨海人紹興二十四年試春
官第一累遷守祕書少監崔淵以外戚張說進

除祕書郎騤封還詞頭未幾出知贛州召還遷祕
書監淳熙五年試中書舍人兼侍講同修國史以
言者罷光宗受禪召試吏部侍郎紹熙二年詔陳
時政得失騤疏三十條皆切時病寧宗即位知樞
密院事兼叅知政事吏部侍郎彭龜年論韓侂胄
將為國患不報請祠騤曰以閤門去經筵何以示

天下侂冑語人曰彭侍郎不貪好官元樞亦欲為
好人耶遂詔提舉洞霄宮嘉泰三年卒贈少傅諡

文簡

謝深甫

宋史本傳字子肅臨海人乾道二年進士調
崑山丞為浙曹考官一時士望皆在選中孝

宗召見深甫言今日人才激昂者急於披露或隣
於好夸剛介者果於植立或隣於太銳靜退簡默
者寡有所合或隣於立異故言未及酌而已齟齬
事未及成而已挫抑於是趨時徇利之人專務身
謀習為軟熟畏避因循苟且年除歲遷亦志通顯
一有緩急莫堪倚仗臣願任使之際必察其實既
悉其實則涵養之以蓄其才振作之以厲其氣裁
培封植勿使沮傷上嘉納遷大理丞江東大旱擢
為提舉常平講行救荒條目所全活一百六十餘
萬人紹熙改元遷起居郎兼權給事中韓侂冑破

格轉遙郡州史深甫封還內降請罷其命右司諫
鄧駟論近習左遣深甫請還駟謂不可以近習故
變易諫官姜特立復詔用深甫力爭竟不得入張
子仁除節度使深甫疏十一上命遂寢每禁庭燕
私左右有希恩澤者上曰恐謝給事有不可耳慶
元年拜右丞相余嘉上書乞斬朱熹絕偽學且
指蔡元定為偽黨深甫擲其書語同列曰朱元晦
蔡季通自相與講明其學果有何罪余嘉熾蟲臣
乃敢狂妄如此當相與奏之行遣
以厲其餘拜少保致仕薨諡惠正

黃宜

台州府志字達之天台人淳熙二年進士歷官
至敎文閣待制卒贈太子少師宜在朝多所建

明力排和議不為權勢
所屈死之日家無餘貲

商飛卿

宋史本傳字暉仲臨海人淳熙初登進士累
官監察御史以言事忤侂冑罷為太常後改

司農卿總領江東淮西軍馬錢糧金陵故有帥漕治所合戎騎二帥留鑰內侍號六司宴飲餽遺費動萬計飛卿以身率儉節縮浮苛

糧饌

以裕間禧中擢戶部侍郎

王居安

宋史本傳字資道黃巖人淳熙十四年進士為秘書丞遷著作郎兼權考功郎官帝誅韓

侂冑居安實贊其決翼日擢右司諫首論陳自強乞追責遠竄為朋邪誤國者之戒又劾郭倪郭僕竄嶺表天下快之繼兼侍講疏言人主公聽則治偏信則亂政事歸外朝則治歸內庭則亂如用人稍誤是一侂冑死一侂冑生也趙彥逾與樓鑰林大中並召居安言彥逾以趙汝愚不與同列政地遂啟侂冑專政之謀汝愚之斥死彥逾之力居多陛下乃使與二人者同升不幾於薰蕕同器乎疏已具有微聞者除目夜下遷起居郎既供職即直前奏曰陛下特遷臣柱下史者豈非欲使臣不得

言耶二史得直前奏事祖宗法也且臣為陛下耳目官諫紙未乾乃以迂權要徙他職不得其言則去臣不復留矣帝為改容御史中丞雷孝友論其越職奪官踰年復知太平州入對帝曰卿有用之才也權工部侍郎知隆興府初盜起郴黑風峒羅世傳為之倡於是五合六聚各以峒名其鄉並起為賊江西列城皆震朝廷憂之以居安為帥羣盜次第平始終用以賊擊賊之策故兵民無傷者徙鎮襄陽以言罷嘉定十五年與魏了翁同召遷工部侍郎理宗即位以敷文閣待制知福州卒贈少保

杜範

宋史本傳字成之黃巖人嘉定元年進士拜監察御史丞相鄭清之妄邀邊功兵民死者十數

萬中外大困範率合臺論其事清之忌之改太常少卿遷祕書監拜殿中侍御史因講筵奏臣常冒

耳目之寄輒忤宰相陛下以其言之不可用又從而超遷之則是臺諫之官專為仕途捷徑陛下但知崇獎臺諫為盛德而不知阻抑直言為弊政則外有好諫之名內有拒諫之實遂極言清之橫啟邊釁幾危宗社并言簽書樞密院事李烏復與史寅午彭大雅以賄交結帝以清之潛邸舊臣鳴復未見大罪未即行範渡江而歸嘉熙四年還朝遷權吏部侍郎改禮部尚書淳祐二年擢同簽書樞密院事凡行事有得失除授有是非悉抗言無隱丞相史嵩之忌之四年遷同知樞密院事以李鳴復叅知政事範去之帝遣中使召回會嵩之遭喪謀起復不果於是拜範右丞相力疾入覲上五事曰正治本肅宮闈擇人才惜名器節財用仍乞早定國本以繫人心帝命宰執各條當今利病與政事可行者範上十二事曰公用舍儲材能嚴薦舉懲賊貪專職任久任使抑僥倖重閭寄選軍實招

土豪疏溝洫治邊理財
未幾卒贈少傅諡清獻

郭磊卿

赤城新志字子奇仙居人嘉定七年進士端平初拜右正言尋擢右史彈劾權倖無所避

初理宗微時與鄞人余天錫善既即位擢至執政而人材猥劣朝論不與磊卿既劾之章凡三上天錫竟罷去史嵩之怙權不法磊卿疏已具俟召對奏之而為嵩之耳目所得亟除磊卿起居郎磊卿憤不得言徑出國門求去磊卿與徐元杰劉漢弼等號端平六君子卒諡正肅立正諫坊以旌之

葉夢鼎

宋史本傳字鎮之寧海人以上舍試入優等釋褐又試中書授祕書省正字遷司封員外

郎進權禮部侍郎兼侍講丁大全柄國欲挽夢鼎卒辭謝之累遷吏部尚書進簽書樞密院事丞相賈似道欲造闕子罷十七十八兩界會于夢鼎以為厲民乃止罷十七界公田法行夢鼎又以為厲

民故行之浙右而止進叅知政事力辭引疾咸淳三年拜特進右丞相兼樞密使累辭不許乃與似道分任利州轉運使王侂嘗以言去官及死其子懇求遺澤夢鼎明其無罪似道以恩不已出罷省部吏數人榜其姓名於朝夢鼎怒曰我斷不為陳自强即求去四年冊楊妃宰相無拜禮吏贊拜夢鼎以笏揮之趨出明日乞還田里詔勉留之進少保力辭疏奏願上收人心固邦本勵將帥飭州縣重賑恤扁舟徑歸瀛國公即位咨訪故老夢鼎上封事二年益王即位於閩召為少師太乙宮使航海遂行道梗不能進後二年卒

元

陳孚

赤城新志字剛中臨海人至元中以布衣上大統賦署上蔡書院山長擢禮部郎中副尚書

梁會奉使安南詰責其世子陳日燁不庭之罪往復三書辭氣正直名重當時尋歷建德衢州兩路治中召為翰林侍制卒追封臨海郡公諡文惠

明

張純誠

兩浙名賢錄字尹誠寧海人洪武初擢江南提刑行部至婺源見黃山民病於茶鹽奏免

之陞監察御史與修律令定官制持議勤正中外肅然一日乞歸省高帝因令招集鄉郡之舊為方氏兵者純誠曰臣事陛下十年無絲毫惠利及鄉里今歸省而首招集鄉里子弟以為兵父老其謂臣何帝動容稱歎而止山東初定欲擇管鹽災者而難其人帝曰前張純誠奏免黃山茶稅不可邪遂以為長蘆運使未至官而卒

夏迪

兩浙名賢錄字廷簡台州人洪武丁卯舉於鄉試政刑部授溧陽丞薦陞大理左寺副廷中稱

平陞文選司郎中拜四川左叅政時朝廷遣使採辦木植踰越歲時厲氣盛行民多橫夭迪因入覲備陳民艱得寬免仁宗即位召拜南京左副都御史詔督常州府稅先是常困於水災迪至今郡守等勘實徧召鄉之巨室諄切諭之發倉廩賑濟公私賴以給助

陳祥

舊浙江通志字從儉天台人永樂甲午舉人授南昌府學教授陞工科給事中奉詔覈諸衙倉

糧綜理周密人不敢私漢庶人叛隨征有功又奉命與平江伯陳瑄選調江北軍吏垣李培言事忤旨免官祥上疏力救後以觸近侍歸

杜寧

舊浙江通志天台人宣德丁未進士第二歷翰林修撰侍講還南京兵部侍郎土木之變寧與

于忠肅謙建議請郕王監國社稷賴以復
安者寧與有力焉居官清介人不敢犯

范理

獻徵錄字道濟天台人宣德庚戌進士用薦知
德安府隨州民數百家田為楚府護衛所占猶

輸租理奏盡歸其田以最超陟福建布政使時大
兵勦賊鄧茂七等理司饋餉兵皆給食民不如賦
擢南工部右侍郎奏各處饋南京糧者自船抵倉
多所費每米石費三斗請兵就其船人支三月之
餉官取費米歲可十萬石以備賑
貸從之尋轉南吏部左侍郎卒

林鶚

獻徵錄字一鶚太平人景泰辛未進士拜監察
御史當是時朝廷方重臺諫一時言事之臣据

據過實鶚獨持大體畧細故有不言言必當其實
英廟復辟擢知鎮江舉偏補弊凡前政之廢弛者
次第興之漕河經孟瀆頗險言者請鑿河自七里
港引金山上流通丹陽以避之巡撫主其議鶚以

其迂遠多石且壞民田廬甚多言於大臣請按京口閘甘露壩故跡因而浚之春夏以閘秋冬以壩則道里近而功力省從之廉憲江西多所平反嘗以歲饑奏蠲恒賦十五萬石過嶺南峒寇不使入境歷陞刑部右侍郎罪無大小必加研審務得其情合於法而後已故獄經鶻所決咸稱無冤

夏塤

獻徵錄字宗成天台人景泰進士為御史出按廣西除奸貪通錢弊民皆便之尋歷江西中貴

人葉達怙勢衆莫敢撻塤累章劾之削其權成化初擢右副都御史巡撫四川歲多劇寇塤立互知會捕法賊得以不熾引病歸

魯崇志

分省人物考字懋功天台人景泰甲戌進士授吏科給事中彈擊不避權要天順初武臣

曹欽跋扈崇志適待漏闕下即馳馬與一偏裨格鬪大軍尋亦合而曹就誅陞南京太僕寺少卿成

化癸已陞應天府尹先是七邑民阻饑逋賦數萬石為勸貸以代之輸而賑其貧者中人王敬怙勢以鹽二萬引懇鬻規重利厲色拒之秩滿加正二品祿仍掌府事終於位

黃孔昭

吾學編名曜以字行太平人天順四年進士為屯田主事陞文選郎中持銓清慎汲汲以

人才為重常曰國家之用才猶農之積粟粟積於豐年乃可以濟饑才儲於平時乃可以濟事頃自人矯激沽名以閉門謝客為高天下人才何由知之公退客至輒見詢訪有得必書於冊隨其地望衆之輒論薦用各當其才或因勢家干請欲私用其人輒力言不可陞右通政南工部侍郎卒嘉靖中贈禮部尚書諡文毅子輔亦為文選郎中輔子綰從張桂後論大禮歷禮部尚書

余錢

臨海縣志字懋器成化乙未進士知崑山縣邑瀕江多水患鐵為設法疏築事不勞而集為政

舉大要民甚德之擢監察御史巡廣右地多瘴毒按部之日父老遮道請勿遍歷鐵曰吾不忍慮土瘴之自病而坐視人瘴之病民也因出瘴說以遺之所至安插流亡招徠狼兵多為効用梧柳諸寨欽跡地方賴以救寧

事竣還京以疾卒

陳世良

分省人物考字崇之臨海人成化丁未進士授樂安令補南和四方流民歸之者千餘家

召為御史彈糾不畏強禦時逆瑾干政竄逐忠良世良抗疏言之為所忌遷南京大理寺丞未幾中以事罰贖米三百餘石瑾敗擢大理少卿拜右僉都御史兼管操江憲度振肅時倚為重適流賊猖獗悉心防禦朝夕申號令刻期督戰所至克捷屢疏乞休得請歸起應天府尹未任卒

夏鍬

兩浙名賢錄字德樹天台人成化丁未進士會主事李文祥庶吉士鄒智御史湯鼐等以論列

大臣言直得罪鋹抗章論救并劾大臣詔逮錦衣衛獄推治無所得釋送銓曹謝病歸弘治十四年復起赴選自台至輦下數千里間見百姓流離科差繁重乃備述其狀以疏進不報久之當受職當局者忌其剛鯁不欲置近要除南京大理寺評事守備內臣違例准受民詞即論奏削其權軍民稱快以母老乞養歸

王啟

獻徵錄字景昭黃巖人成化丁未進士授霍邱知縣擢監察御史言皇親張鵬齡家奴生事及

守備內官董讓不法陞江西按察僉事進副使以事觸怒劉瑾降廣西容縣知縣瑾敗復為四川蓬州知州歷陞江西右布政使奏罷寧濠私貢新茶新笋數事時寧濠威縱方熾人皆以為難尋以右副都御史巡撫雲南輯綏有方陞刑部右侍郎

王純

舊浙江通志仙居人成化辛丑進士授工部主事會王恕致仕純言恕社稷臣無容輕棄上怒

命詔獄隨謫思南推官弘治元年吏部主事儲璣言王純以直言殉國乞置之風紀論思之地與其旋求敢諫之士不若先用已試之人報可當事忌其慇乃外擢湖廣督學純較士先行誼抑浮競士類翕然向風未竟厥用而卒

王曠

獻徵錄字存約黃巖人弘治壬戌進士授太常博士擢工科給事正德初轉刑科時中官多橫

御史林有年僉事韓邦奇咸以駕帖被逮曠言錦衣乃扈從爪牙之寄駕帖非尋常勾攝之文今不問巨細虛實一概施之非盛事也謫惠州府推官嘉靖改元擢應天府尹疏數十上如議罷京尹種馬議發內帑絲織神帛議輕荒稅蘇流亡議料田出賦均貧富皆不避嫌怨為之陞南刑部侍郎擢

右都御史舊內守備進表取御史兩人監禮煥曰
中人行禮奈何輕用朝廷耳目官乎執不與奉表
北上大學士夏言尊貴京堂官率多隅坐
煥獨據正席贊惟一幣夏不悅因乞骸歸

應良

台州府志字元忠仙居人正德戊辰進士辛未
廷試選庶吉士時劉瑾雖誅閹倖仍熾遂解組

歸世宗御極用臺諫交薦起為侍從會議大禮忤
旨杖闕下尋奉使冊唐王悉却贐餽出督學山東
陞廣西叅政齋表北上張桂二老欲招致之密曰
北司成正以進公良正色曰朝廷官爵奈何私許
人乃外陞廣東右布政無
何致仕歸遺文曰閒存集

余寬

舊浙江通志字仲栗臨海人正德辛未進士歷
文選郎中嘉靖甲申翰林部寺臺諫諸臣力爭

興獻帝興國太后本生二字不宜削於金水橋南
伏哭帝命司禮監諭退不去大怒命錄諸姓名收

繫為首者八人於獄寬與焉次日命拷訊謫寬戌海南丙戌以御史謝汝儀言放歸卒於家隆慶改元褒錄先朝直言諸臣

復寬職贈大理寺卿

陳器

台州府志字德器臨海人正德甲戌進士授淮安推官持法不畏權貴郡有鎮守總戎丞以下

咸以屬禮見器力爭於督撫獨與抗禮遂著為令陞刑部主事多所平反會武宗巡游儲貳未定器抗章奏請言甚激切尋以終養回里張孚敬秉政器服闋竟不赴補年七十五卒

吳廉

獻徵錄字介夫仙居人正德甲戌進士授禮科給事中時郭勛張鶴齡以勲戚貴幸廉首論二

家驕蹇武廟巡行西北邊廉偕同官泣留跪午門外三日正德末儲貳未建逆奄畢鎮表宸濠孝行於朝冀召入廉據法駁還事遂寢未幾濠果以叛誅又請罷江西鎮守轉戶科右給事中世廟嗣統

首條四事曰正君心開言路時經筵近儒臣上嘉納之轉禮科左給事出為四川叅議按蜀蠲害興利糾重臣之使蜀殃民者性耿介不能逐時好為俯仰三疏乞歸

何贊

舊浙江通志黃巖人嘉靖壬辰進士授行人擢監察御史上疏乞賑山西饑民全活甚衆按河

東鹺政解池鹵源久賈公私告病贊至齊沐為文禱於神數日凝液如初巡歷期滿所司循故事以美鑑進贊斥去歸諸公安南之亂以翊贊征討功賜金帛錫燕例得遷卿佐以忤嚴嵩轉福建按察使副

趙大佑

分省人物考號方厓太平人嘉靖乙未進士為鳳陽推官即有聲拜御史按貴州宣慰萬

銓所為多不法大佑械其黨指揮張仁李木斃諸獄將遂按銓巡撫劉某納銓賄移文諸司指仁木

之死為召釁以脅之大佑曰人臣苟利社稷死生
以之吾何愛一身哉更遣吏按銓反狀銓知不可
撼即囚服出就理比還條八事詔下貴州編諸令
甲歷刑部侍郎奉命勘伊庶人嚴嵩屬大佑寬之
至則盡發庶人所為僭擬及事之與祖訓違者嵩
怒甚出大佑掌南臺轉南刑部尚書有冤獄逮繫
數年大佑曰死重辟也法官固知其冤
不為白乎遂以疑獄改南兵部尚書卒

王宗沐

臨海縣志字新甫嘉靖甲辰進士授刑部主
事陞江西提學副使調廣西右布政丁父憂

除服補山東會膠河淤塞朝廷遣給事中相視開
鑿宗沐條議海運之法十二利詳攷顛末如指掌
擢右副都御史總督漕運兼巡撫鳳陽先是屢年
運路不通宗沐飭法振弊首申全單之法舊例各
州縣每年應運糧米由運糧把總分派而各衛各
幫水次有難易高下之分官旗吏書因而作弊自

全單設凡某幫運某州縣米悉由漕司派定每幫各給一紙遵行陋規頓革又自淮安至清江閘築為雙堤高壯若城墉西增高家舊堰以遏橫潰東濬澗河以洩霖積每大水漲溢隄以內民廬安堵陞工部侍郎改刑部卒諡襄裕

吳時來

兩浙名賢錄字惟修仙居人嘉靖癸丑進士授松江推官倭犯境時來攝城守雨甚城崩

十餘丈時來以強弩數十人扼其衝急興版築三日而城完賊知有備棄而北走召為刑科給事中時嚴嵩父子橫甚時來疏其不法事逮詔獄廷杖得不死遣戍嶺表隆慶改元起官洊晉南京右都御史致仕

盧明詠

續獻徵錄字君發黃巖人萬厯丙戌進士授太常博士擢刑科給事中內侍頓隆犯罪已

下部議尋見原滇南歲進礦金初議量減尋復故
明詠并疏叅駁忤中官意因給假歸尋補戶科右
給事倭陷朝鮮力陳石星議款之失又言經畧並
建事鮮責成後所言皆驗卒年四十二天啟癸亥
追論遺直
贈光祿卿

應朝卿

舊浙江通志字行叔仙居人萬厯己丑進士
授建安令課最調繁晉江擢山西道御史巡

按貴州轉兩淮巡鹽兩淮鹽賦半天下弊政較他
處倍多朝卿湔剔殆盡商困得蘇復命巡按湖廣
風裁益著以母老歸省為隙者
所議左遷永平道終按察司使

吳執御

黃巖縣志字君駕天啟壬戌進士任濟南推
官德州建魏忠賢祠獨不往崇禎庚午授刑

科給事中時有加派捐助搜括之議執御疏曰理
財加派不得已而用之未有年餘不罷者捐助搜

括二者尤難為訓不聽又論沿邊諸邑宜選補賢
守令以本地錢糧訓練土著此法一行餉不取償
於司農兵不待援於戍卒計無便於此者亦不聽
復疏指首輔周延儒攬權壅蔽私其鄉人塘報章
奏一字涉邊疆輒借軍機密封下部明畏廷臣摘
發短長他日敗可以提聞功可以罪按也凡三上
俱留中帝責其多言而慙尋
釋之家居謝客年四十六卒

金華府

唐

馮宿

唐書本傳字拱之婺州東陽人貞元中與弟定
並擢進士第長慶時進知制誥歷工部刑部二

侍郎修格後敕三十篇行於世擢東川節度使完
城郭增兵械涪水數壞民廬舍宿修利防庸一方

便賴疾革將斷重刑家人請宥之宿曰命之修短天也撓法以求祐吾不敢卒諡曰懿

馮定

唐書本傳字介夫偉儀觀與兄宿齊名人以方漢二馮第進士異等歷國子司業遷太常少卿

文宗嘗詔開元霓裳舞衆以雲韶肄於庭定部諸工立縣間端凝若植帝異之遷諫議大夫是歲訓注敗多誅公卿中外危惴及改元天子御前殿仇士良請以神策仗衛殿門定力爭罷之鄭覃兼太子太師上日欲會尚書省定據禮當集詹事府詔可論者多其正以左散騎常侍致仕卒諡曰節初源寂使新羅其國人傳定黑水碑畫寫記韋休符使西番所館寫定商山記於屏其名播如此

宋

胡則

金華先民傳字子正永康人端拱己丑進士釋褐調許田尉以幹辦聞改著作郎僉書貝州觀

察判官會遣使省冗役檄則行河北道凡去籍者
十萬餘民用休息遷屯田員外郎提舉江南路銀
銅場鑄錢監得吏所匿銅數萬斤咸懼且死則曰
吾豈重貨而輕數人之生耶籍為羨餘不之罪轉
戶部郎中遣太常少卿初丁謂客許田則待之甚
厚及謂為執政推故之情不絕謂徙朱厓坐累謫
知福州有官田數百頃已佃為民業計臣上言請
蠲之責其估三十萬貫民不勝弊則章三上竟得
報減其直之半進給事中入權三司使不以尅下
為功時朝廷方以兩京陝西權鹽病民議改通商
有司憚於改作則首請如詔事遂行進刑部侍郎
知杭州加兵部侍郎致仕卒則嘗奏免衢婺二州
自丁錢民懷其德
戶皆立像祠之

滕元發

宋史本傳字達道東陽人舉進士授大理評
事通判湖州召試為集賢校理同修起居注

英宗書其姓名藏禁中未及用神宗即位召問治亂之道對曰治亂之道如黑白東西所以變色易位者朋黨汨之也神宗曰卿知君子小人之黨乎曰君子無黨譬之草木綱繆相附者必蔓草非松柏也神宗以為名言進知制誥拜御史中丞種諤擅築綏州發諸路兵剽掠夏人元發疏言諒祚已納款不當失信邊隙一開兵連民疲必為內憂又宰相以其子判鼓院諫官謂不可神宗曰鼓院傳達而已何與於事元發曰人有訴宰相使其子達之可乎神宗悟為罷之河北地大震命元發為安撫使時城舍多圯吏民懼壓皆幄寢菱舍元發獨處屋下曰屋摧民死吾當以身同之瘞死食饑除田租修隄障察貪殘督盜賊北道遂安除翰林學士知開封府王安石方立新法元法以翰林侍讀學士出知定州初入郡言新法之害曰臣始以意度其不可耳既為郡乃親見之歲旱求言又疏奏

新法害民皆不聽歷知齊鄧二州哲宗登位除龍圖閣直學士知鄆州時淮南京東饑元發慮流民且至將蒸為癘疫先度城外廢營地召諭富室使出力為席屋一夕成二千五百間并竈器用皆具民至如歸所全活五萬徙真定又徙太原治邊凜然威行西北號稱名帥以龍圖閣學士知揚州未至而卒贈左銀青光祿大夫諡章敏

宗澤

宋史本傳字汝霖義烏人登元祐六年進士第調龍游令民未知學澤為建庠序設師儒講論經術風俗一變通判登州境內官田數百頃皆不毛之地歲輸萬餘緡率橫取於民澤奏免之朝廷遣使由登州結女真盟海上謀夾攻契丹澤語所親曰天下自是多事矣退居東陽結廬山谷間靖康元年中丞陳過庭等列薦假宗正少卿充和議使澤曰是行不生還矣或問之澤曰敵能悔過退

師固善否則安能折節北庭以辱君命乎議者謂澤剛方不屈恐害和議上不遣命知磁州時太原失守官兩河者率托故不行澤曰食祿而避難不可也即日單騎就道磁經敵騎蹂躪之餘人民逃徙帑廩枵然澤至繕城壁浚隍池治器械募義勇為固守計上言邢洺磁趙相五州各蓄精兵二萬人敵攻一郡則四郡皆應是一郡之兵常有十萬人上嘉之除河北義兵都總管康王再使金行至磁澤迎謁曰肅王一去不返今敵又說辭以致大王願勿行王遂回相州有詔以澤為副元帥從王起兵入援時康王開大元帥府撤兵會大名澤履水渡河見王謂京城受圍日久入援不可緩會曹輔齋蠟封欽宗手詔至自京師言和議可成澤曰金人欲欺我師耳君父之望入援何啻饑渴宜急引軍直趨澶淵次第進兵以解京城之圍萬一敵有異謀則吾兵已在城下汪伯彥等難之勸王遣

澤先行自是澤不得預府中謀議二年正月澤至開德十三戰皆捷康王承制以澤為徽猷閣待制時金人逼二帝北行澤聞即提軍趨滑趨黎陽至大名欲徑渡河據金人歸路邀還二帝而勤王之兵卒無一至者又聞張邦昌僭位欲先行誅討會得大元帥府書約移師近都按甲觀變澤復書于王因累表勸進王即帝位於南京澤入見涕泗交頤陳興復大計上欲留澤黃潛善等沮之除龍圖閣學士知襄陽府改知青州開封尹闕李綱言綏復舊都非澤不可尋徙知開封府時敵騎留屯河上金鼓之聲日夕相聞而京城樓櫓盡廢兵民雜居盜賊縱橫澤至首捕誅舍賊者數人下令曰為盜者賊無輕重並從軍法由是盜賊屏息民賴以安王善者河東巨寇也擁衆七十萬楊進號沒角牛兵三十萬王再興李貴王大郎等各擁衆數萬往來京西淮南河南北侵掠為患澤悉招降上疏

請上還京除延康殿學士京城留守兼開封尹澤乃渡河約諸將共議收復而於京城四壁各置使以領招集之兵又據形勢立堅壁二十四所於城外沿河鱗次為連珠砦連結河東河北山水砦忠義民兵於是陝東西諸路人馬咸願聽澤節制秉義郎岳飛犯法將刑澤一見奇之以五百騎授飛使立功贖罪飛大敗金人而還升飛為統制飛由是知名詔遣官迎奉六宮往金陵澤上疏言南幸之非金將烏珠渡河謀攻汴京諸將請先斷河梁嚴兵自固澤笑曰去冬金騎直來正坐斷河梁耳乃命部將劉衍趨滑劉達趨鄭以分敵勢戒諸將竭力保護河梁以俟大兵之集金人聞之夜斷河梁遁去自是不復犯東京王策者本遼酋為金將往來河上澤擒之解其縛坐堂上因問敵國虛實盡得其詳遂決大舉之計召諸將謂曰汝等有忠義心當協謀勦敵期還二聖以立大功言訖泣下

諸將皆泣聽命金人戰不利悉引兵去澤威聲日著北方聞其名常尊憚之對南人言必曰宗爺爺澤前後請還京二十餘奏每為潛善等所抑憂憤成疾疽發於背諸將入問疾澤曰吾以二帝蒙塵積憤至此汝等能殲敵則我死無恨衆皆流涕曰敢不盡力諸將出澤嘆曰出師未捷身先死長使英雄淚滿襟翼日風雨晝晦澤無一語及家事但呼過河者三而薨都人號慟遺表猶贊上還京贈觀文殿學士通議大夫諡忠簡子穎居戎幕素得士心澤薨都人請以穎繼父任會朝廷已命杜充留守以穎為判官充反澤所為穎屢爭之不從乃請持服歸官終兵部郎中

潘良貴

宋史本傳字子賤婺州金華人以上舍釋褐為辟雍博士遷祕書郎時宰相蔡京與其子

攸方以爵祿釣知名士親故數為京致願交意良貴正色謝絕除主客郎中尋提舉淮南東路常平

靖康元年召還賜對欽宗問孰可秉鈞軸者良貴極言何臬唐恪等四人不可用他日必誤社稷語徹於外當國者指為狂率黜監信州泃口排岸高宗即位召為左司諫請封宗室賢者於山東河北以壯國體巡幸維揚養兵威以圖恢復黃潛善汪伯彥惡其言改除工部良貴以不得其言求去主管明道宮越數年除考功郎遷左司宰相呂頤浩謂良貴曰旦夕相引入兩省良貴正色對曰親老方欲乞外兩省官非良貴可為也退語人曰宰相進退一世人才何可握手密語先示私恩若士大夫受其牢籠何以立朝即日乞補外以直龍圖知嚴州起為中書舍人會戶部侍郎向子諲入見語言煩褻良貴故善子諲是日攝起居立殿上諲至榻前厲聲曰子諲以無益之談久煩聖聽子諲欲退高宗顧良貴曰是朕問之諭子諲且歎語子諲語久不止良貴叱之退者再高宗色變閤門併彈

之於是良貴求去以徽猷閣待制提舉亳州明道宮李光得罪坐嘗與通書降二官卒其諫疏多火

臺僅存雜著十五卷
新安朱熹為之序

樓焘

宋史本傳字仲暉婺州永康人政和五年進士紹興六年召為左司員外明年遷起居郎言監

司郡守係民甚切乞令侍從官各舉通判資序或嘗任監察御史以上可任監司郡守者一二人詔從之歷除端明殿學士簽書樞密院事命往陝西宣諭德意至長安會李世輔自夏國欲歸朝焘以書招之世輔以二十人赴行在始還朝以親老求歸省許之十四年除簽書樞密院事兼權叅知政事尋與祠

卒諡襄靖

王師心

金華先民傳字與道金華人政和八年進士調海州沐陽縣尉敗劇賊來江境上累遷太

府丞除知袁州時秦檜方用事監司郡守皆爭獻
美餘以希進師心獨取以代貧民逋租檜死召除
戶部侍郎上曰卿以不附秦檜故去國久朕知卿
未嘗忘也遷權吏部尚書兼侍讀前後進見從容
盡規者非一浙東水災充兩浙安撫使寬逋債振
乏絕民不流亡乾道初以左奉議大夫致仕卒諡
敏莊

鄭剛中

金華先民傳字亨仲金華人紹興二年進士
累遷殿中侍御史胡銓上書欲斬秦檜帝怒

禍且不測剛中率同列論救銓得編置除端明殿
學士四川宣撫使宣司舊治河池饋餉不繼剛中
奏移治利州大開營田自階成抵秦壘土三千餘
頃歲收十八萬斛蠲民間常所歛錢七百萬又即
州置監鑄錢以救川引之弊先是川口屯兵十萬
分隸三大將建節而統制官亦皆領沿邊安撫剛

中請分利州為東西路東路治興元命楊政為安撫西路治興州命吳璘為安撫諸裨將領安撫者皆罷璘等皆宿將驕悍難制剛中每折之以威接之以恩無不帖服在蜀凡六年儲蓄豐積將士用命金人不敢犯秦檜見蜀富饒諷使進金三萬兩又令下米荊門剛中曰今時講和正為他時恢復計要當息民儲備為先拒之不從檜不悅召剛中還文致其罪罷職責桂陽軍居住再徙封州卒檜死追復原官諡忠愍

章服

金華先民傳字德文永康人紹興二年進士累遷朝奉郎除兩浙提舉市舶公事自常俸外例

所得者一不取然對人亦不輒非前例轉朝請郎差知建州省教條寬科率與吏民相安於法守州以大治召除吏部員外郎遷侍御史上疏言淮堧瘡痍江浙饑饉邦財未裕軍政久隳此皆當今

欽定四庫全書

卷一百六十一

急務不宜以偃兵而置度外中官梁彥俊幹辦皇城司轉官不行臺謝服劾其廢法彥俊坐論贖會服除吏部侍郎辭免彥俊摘其章有不遜語上怒罷汀州居住在汀七年杜門觀書世念泊如得旨放還提舉太平興國宮卒

葉衡

宋史本傳字夢錫金華人紹興十八年進士知臨安府於潛縣徵科為期限榜縣門俾里正諭

民不遣一吏而賦自足歲灾蝗不入境治為諸邑最擢知常州時水潦為災衡發倉為廩以食饑者或言常平不可輕發衡曰儲蓄正備緩急可視民饑而不救耶疫大作衡單騎命醫藥自隨徧問疾苦活者甚衆除太府少卿合肥潁湖有圩田四十里衡奏募民以耕歲可得穀數十萬蠲租稅二三年後阡陌成徹營田官私各收其半從之除戶部侍郎時鹽課大虧衡奏年來課入不增私販害之

也宜自煮鹽之地為之制司火之起伏稽竈之多寡亭戶本錢以時給之鹽之委積以時收之擇廉能吏察之私販自絕矣厯除簽書樞密院事拜參知政事衡奏二事一牧守將帥必擇才以稱其職久任以盡其材二令戶部取湖廣會子實數盡以京會立限易之從之拜右丞相兼樞密使上銳意恢復凡將帥器械山川防守衡悉經思慮奏對畢從容賜坐講論機密或不時召對年六十二薨贈資政殿學士

陳良祐

宋史本傳字天與金華人紹興二十四年進士乾道三年除起居舍人遷右司諫首言會

子之弊願捐內帑以紓細民之急上慨然發內府白金數萬兩換會子收銅版勿造軍民翕然除給事中遷吏部尚書時議遣北使請地良祐奏今之求地欲得河南曩歲嘗歸版圖不旋踵而又失如

其不許徒費往來若其許我必邀重幣經理未定根本內虛又將隨而取之矣奏入忤旨貶瑞州居住淳熙四年起知徽州尋除敷文閣待制知建寧府

林大中

宋史本傳字和叔永康人紹興三十年進士光宗受禪除殿中侍御史奏言進退人才當

觀其趨向之大體不當責其行事之小節又論今日之事莫大於讐恥之未復此事未就則此念不可忘時江浙四路民苦折帛和買重輸大中曰有產則有稅於稅絹而科折帛猶可言也如和買折帛則重為民害蓋自咸平馬元方建言於春預支本錢濟其乏絕至夏秋使之輸納則是先支錢而後輸絹其後則錢鹽分給又其後則直取於民今又令納折帛錢以兩縑折一縑之直大失立法初意朝廷以其言為減所輸者三歲馬大同為戶部大中劾其用法太峻章三上不報又論大理少卿

宋之瑞章四上不報以言不行求去改吏部侍郎
辭不拜乃除直寶謨閣朱熹貽書朝士曰聞林和
叔入臺無一事不中的去國一節風義凜然當於
古人中求之寧宗即位遷給事中韓侂胄來謁陰
請納交大中笑而却之會吏部侍郎彭龜年抗論
侂胄與郡大中繳奏請留龜年經筵而命侂胄以
外任不聽呂祖儉以攻侂胄謫韶州大中救之汪
義端以論趙汝愚為右史大中駁之改吏部侍郎
不拜以煥章閣待制知慶元府城南民田潮溢不
可種大中捐公帑治石築之民不知役而蒙其利
郡訛言夜有妖大中謂此必黥賊所為立捕黥之
人情遂安後乞休歸屏居十二年未嘗以得喪關
其心或勸大中通侂胄書大中曰吾為夕郎時一
言承意豈閒居至今日耶客曰縱不求福盍亦免
禍大中曰福不可求而得禍詎可懼而免及侂胄
誅即召試吏部尚書言呂祖儉彭龜年朱熹宜優

加旌表其他因譏切侂冑以得罪者望量其輕重而旌別之嘉定改元兼太子賓客卒諡正惠

應孟明

宋史本傳字仲實永康人隆興元年進士以薦為勅令所刪定官輪對首論南北通好當

選將練兵常如大敵之在境次乞申嚴監司庇貪吏之禁薦舉徇私情之禁帝嘉獎久之拜大理寺丞出為福建提舉常平陛辭帝曰朕知卿愛百姓惡賊吏事有不便於民宜悉意以聞因問當世人才孟明對曰有才而不學則流為刻薄惟上之教化明取舍正使回心嚮道則成就必倍於人帝曰誠為人上者之責孟明至部具以臨遣之意咨訪之尋除浙東提點刑獄進直祕閣知靜江府兼江西經畧安撫初廣西鹽易官搬為客鈔客戶無多折閱逃避遂抑配於民公私交病孟明條具驛奏除其弊禁卒朱興結侶弄兵雷化間聲勢漸長孟明遣將縛致斬之光宗即位召為吏部員外郎慶

元初權吏部侍郎卒孟明以儒學奮受知人主官職未嘗倖遷韓侂冑嘗遣其密客誘以諫官俾誣趙汝愚孟明不答士論以此重之

楊大法

金華先民傳字元範婺州武義人淳熙二年進士累遷監察御史時四方多水旱大法疏

論三事一曰民訴災傷不可疑其不實二曰減放租稅當使民被實惠三曰禁遏糴使穀粟流通尋除侍御史兼侍講乞置言事官章簿以備燕覽內侍鄧彰等指使毆人至死奏行法當自近始乞付有司以竟獄事除兵部侍郎卒贈中奉大夫武義開國男

葛洪

宋史本傳字容父婺州東陽人淳熙十一年進士遷工部員外郎上疏乞嚴飭將帥申覆軍實

帝嘉納之累遷工部尚書拜叅知政事封東陽郡公致仕卒諡端獻杜範嘗稱其侃侃守正有大臣

風

卷一百六十一

章徠

金華先民傳永康人淳熙甲辰進士歷官右文

殿修撰時陳賈議貶道學徠與劉光祖極論道

學之正光宗嘉納及趙汝愚罷相徠抗疏劾韓侂

冑專擅坐罷官歸實慶間召為宗正少卿兼侍講

卒贈
少師

王介

宋史本傳字元石金華人紹興元年進士除國

子錄寧宗即位介上疏言陛下即位未三月策

免宰相遷易臺諫悉出內批非治世事時韓侂冑

居中潛弄威福疑介詆已且其弟仰冑嘗以舊識

求通介拒絕之侂冑怨益深會學禁起諫大夫姚

愈劾介與袁燮皆偽學之黨主管台州崇道觀侂

冑誅召還除國子祭酒陞太子右諭德篤意輔導

因事規諫遷權中書舍人繳駁不避權貴張允濟

以閣職為州鈐介卦還詞頭丞相語介曰此中官
意介曰宰相而逢宮禁意向給舍而奉宰相風旨
朝廷紀綱掃地矣以疾奉祠卒特
贈中大夫寶章閣待制諡忠簡

喬行簡

宋史本傳字壽朋東陽人紹熙四年進士歷
官祕書監權工部侍郎理宗即位拜叅知政

事時議收復三京行簡上疏曰臣不憂出師之無
功而憂事力之不可繼因陳所憂者三不果從尋
拜右丞相或又陳進取之計行簡奏今內外事勢
可憂而不可恃者七言甚懇切師得不出嘉熙三
年拜平章軍國重事四年加少師封魯國公薨贈
太師諡文惠行簡歷練老成識量宏遠居官無所
不言薦錢時吳如愚
皆當時隱逸之賢者

徐邦憲

宋史本傳字文子義烏人紹熙四年進士遷
祕書郎韓侂胄開兵端無敢議其非者邦憲

獨首言之丐外知處州陞辭力諫用兵不可太驟再歲召還言求名義以息兵莫若因建儲而肆赦借殊常之恩洗弄兵之咎侂冑惡其言嗾御史徐枏擊之鐫秩罷祠侂冑誅尚書倪思舉邦憲自代除權工部侍郎知臨安府

丐祠知江州卒諡文肅

范鍾

宋史本傳字仲和蘭谿人嘉定二年進士歷遷尚書右郎官兼崇政殿說書進對帝曰仁宗時

甚多事對曰仁宗始雖多事乃以憂勤致治徽宗始雖無事餘患至於今日帝悅歷遷權兵部尚書兼侍講嘉熙四年授叅知政事淳祐五年特拜左丞相兼樞密使封東陽郡公鍾為相直清守法重惜名器雖無赫赫可稱而清德雅量與杜範李宗勉齊名連贈少師諡文肅

李大同

金華先民傳字從仲東陽人嘉定十六年進士累遷右正言兼侍講首陳謹獨之戒上為

之改容遷禮部侍郎進尚書乞祠卒大同資稟純厚神氣清和至於忠言嘉謨上裨緝熙下濟民生嘉熙端平之治大同之助為多

朱元龍

王闕朱左司集序字景雲義烏人嘉定十六年進士選除宗正丞兼權左司郎官宦官陳

恂益求建節事下都司議元龍擬曰優異內官罷責節鉞雖出於特恩主張國是愛惜名器必由於公論不可宰臣傳旨令改擬對曰吾職可罷筆不可改也有宗室與民訟爭田衆莫敢決元龍曰於法品官不許佃民田奈何天子屬籍之親乃爭田訟耶毅然決之時議括兩淮浮鹽元龍謂朝廷而行商賈之事廟堂而踵諸國之規使史氏書曰括浮鹽自今日始不可又兩上封事自宮禁朝廷以及百官萬民皆痛切言之先是史嵩之在督府元龍劾其殺富民王倫為非已而嵩之入相遂斥去

祠子

王萬

宋史本傳字處一家世婺州嘉定十六年進士差知台州事至立斷吏無所售往往改業散去

民亦化之不復訟上下肅然郡以大治遷屯田員外郎擢監察御史史嵩之自江上董師入相萬首論之謂其事體迫遽氣象傾搖然當時論相之事已決疏入遷大理少卿力辭乞休特轉朝奉郎守太常少卿致仕卒嵩之罷相衆方交論其非上思萬先見親賜御札謂萬立朝謇諤古之遺直為郡廉平古之遺愛贈新會五千貫田五百畝以贍給其家

馬光祖

宋史本傳字華文金華人寶慶二年進士累遷江東安撫使知建康府減租稅養鰥寡興

學校禮賢才辟召僚屬皆極一時之選拜端明殿學士知江陵府去建康之民思之不已帝聞命以

資政殿學士沿江制置使再知建康士女相慶光祖益思寬養民力興廢起壞知無不為獨前逋負錢百餘萬鰥魚利稅課悉罷減與民建平糴倉貯米十五萬石又為庫貯糴本二百餘萬鰥補其折閱發糴常減於市價以利小民修飭武備防拓要害邊賴以安其為政寬猛適宜事存大體公田法行光祖移書賈似道言公田法非便乞不以及江東必欲行之罷光祖乃可召遷提領戶部財用兼知臨安府浙西安撫使會歲飢榮王府積粟不發廩光祖謁王得粟活民甚多再以沿江制置江東安撫使知建康民為建祠六所咸淳三年拜叅知政事五年拜知樞密院事以金紫光祿大夫致仕

卒諡
莊敏

元

吳直方

宋瀛吳直方行畧字行可婺之浦陽人泰定元年太師滿濟勅囑台留守灤京延入賓館使

教其子托克托元統二年托克托方執法中臺言於上命為江浙等處儒學提舉歷遷宣政院長史秦王巴延特定策功專權自恣上深患之召托克托問計托克托謀於直方直方曰宜急黜之以謝天下托克托以親嫌辭直方曰傳有之大義滅親大夫知有朝廷耳托克托曰事不成奈何直方曰事不成天也一死復何惜即死亦不失為忠義耳托克托頗足曰吾意決矣乃入奏久之適巴延侍太子出獵柳林托克托欲發直方曰太子在軍中設挾之以生他變何以處之托克托悟急白太后傳旨趣以歸遣使持詔散遣諸軍出巴延為河南行省一反舊政民大悅上多直方協贊功召對慰諭超授集賢院侍講學士有大事必定於直方直方亦毅然以澤被斯民為已任科舉廢已久直方力言於丞相曰科舉

之行家有讀書之人人讀書則自不敢為非其有繫於治道不小丞相因奏復之二浙鹽值漸增至數倍民不堪命直方為言之減其額而下其估他如楮幣銅錢相權之宜有司公田多科之擾官寺建設之冗繁江南雇役之長利咸一一建白多已見諸行事後年老乞骸遂以榮祿大夫致仕

明

宋濂

史榮字景濂號潛溪先金華人後遷浦江六歲授蒙求一日而盡受業於聞人夢吉得春秋三

傳之旨兼通五經從淵穎吳萊學悉得其間奧柳貫黃潛深器重之至正己丑薦為國史編修固辭入龍門山著書曰龍門子高帝徵入金陵問定亂大計濂以不嗜殺人對上悅除江南儒學提舉授世子經召講左氏傳濂曰春秋褒善貶惡遵而行之賞罰適中天下可定洪武二年總修元史除翰

林學士知制誥兼修國史時甘露屢降上問災祥之故對曰受命不於天於其人休符不於祥於其仁遷國子司業贊善大夫上問帝王宜讀何書濂謂讀真德秀大學衍義上立取覽令人書揭兩廡壁上坐西廡令講司馬遷論黃老事講畢復言曰人主能義理養性則邪說不能侵興學教民則禍亂不能作刑罰非所先也陞侍講學士兼資善大夫集歷代事為辨奸錄纂大明日歷倣唐貞觀政要輯成寶訓五卷上之其他禮樂律歷之制勲臣名卿焯德耀功之文並命編摩潤色每燕見詢舊章講治道甚條析至論廷臣但言其善者問否者為誰對以善者與臣友故知之否者縱有臣不知也凡命為詩文必寓忠告性謹密不洩禁中語有奏輒焚其稿除翰林學士承旨日本使奉勅求文獻百金不受上問濂對曰入朝侍從受外夷金非所以崇國體上然之致仕居青蘿山閉門著述人

不見其面後以孫慎坐法安置茂州行至夔卒年七十三正德八年賜諡文憲

劉辰

獻徵錄字伯靜金華人洪武初師下婺州辰首上謁署典籤後為湖廣道御史以謬諤聞擢知

鎮江府興廢舉墜勤於其政郡有瀕江田五十餘頃歲久淪沒仍責賦於民辰請於朝除之京口閘廢舟楫不通東南漕運者轉新河江陰二港以出江多為風濤阻溺辰乃於京口至呂城百二十里作壩修閘順水勢之出入漕河源淺易涸每仰練湖以益水而湖有三斗門亦廢辰又修築之及成漕運既通而湖下之田亦稔永樂元年陞江西叅政至則以久雨江水泛溢九江諸郡等田皆勞檄郡邑勸富民出粟以賑飢者蠲其役以當其息官為之券約明年償本粟由是富者樂從饑者得食南安贛州等九府荒田糧六萬石有司歲抑取於民辰以聞悉蠲其額後以同官坐事相連免歸永

樂六年起為刑部
左侍郎以老致仕

邵玘

楊士奇邵玘墓碑字以先蘭谿人永樂丙戌進士授監察御史陞江西按察使先是南昌新建

二縣苦上官和買長里役者供一日費家為之空
玘立罷之宣德三年召為南京都察院左副都御
史時南京諸司緩弛玘奉勅簡擇奏黜其不肖及
庸懦者綱紀復振玘為人外肅內寬任二十餘年
所歷中外皆風憲糾劾官邪舉大體而畧
瑣細廉潔之操始終一轍宣德五年卒

盧睿

分省人物考字仲思東陽人永樂辛丑進士拜
監察御史正統己巳陞右僉都御史巡撫大同

宣府至則嚴法令剋蠹弊節浮費廣儲蓄人賴以
安辛酉改命叅贊寧夏軍務增築鳴沙州興武二
城列置烽堠十餘所益廣屯種繕甲兵校士馬以
固邊備而於軍民利病可施罷者尤盡心焉陞右

副都御史後
以病乞歸

李叙

金華先民傳字秉彝東陽人永樂中由鄉薦入太學宣德初試授監察御史嘗奉命錄囚辨出

交趾俘囚三千餘人出巡淮甸首擒豪右范端操等十餘人置之獄餘皆屏跡官吏有貪墨者一切汰去中使取珍禽異獸至淮者叙陳其害民悉報罷及還朝權貴搆以事下獄會八百車里二番讐殺屢遣廷臣招撫不服朝議以為惟叙可乃左遷行人領旨往諭至則曉以禍福逆順皆聽命息兵通貢上喜復以為御史天順改元致仕歸

趙艮

金華先民傳字時中永康人成化己丑進士授給事中因災異條陳四事忤旨廷杖幾斃歲丙

午左右請立宮塋所生二歲子為太子艮抗疏力諫止之及孝廟正位東宮請簡正人為師傅以職

輔導陞本科都給事中先是重臣王越被劾銜之
譖於中官汪直誣以言事不謹謫四川廬山令弘
治改元擢江西按

察副使卒於官

徐沂

金華先民傳字希曾永康人弘治癸丑進士授
刑科給事中時壽寧侯張鶴齡等恃恩冒法及

中官李廣矯命干政沂皆抗章論之改南京工科
奏罷歲取蘇州樞密苧布福建改機陝西馳緘民
稱便焉陞廣東

叅政卒於官

章拯

萬厯金華府志字以道蘭谿人弘治壬戌進士
授工部主事忤逆瑾謫梧州通判瑾誅召為南

吏部主事陞廣東提學副使振孤寒抑僥倖標示
正學士習一變尋陞右副都御史改總理河道時
河決魯橋有獻議欲挽河使北漸復禹故道者拯
議為今計當迹前績而度時宜增卑培薄塞潰疏

壅分殺其怒斯為實幹若羞出漢人下策欲求夏
禹全功工役一興必至疲民誤國所不敢為也得
旨陞工部侍郎治其事乃請浚孫家渡分殺河勢
甫興工而夏潦驟溢未及底績言者論之改督視
顯陵工程以盛應斯代別議開昭陽湖新河功竟
不就更以潘希曾代之迨用拯議河以無患拯還
朝陞工部尚書時夏言建請分祭四郊拯上議乞
如舊制合享忤旨鐫秩歸隆慶初贈太子少保謚
惠恭

潘希曾

程文德潘希曾傳字仲魯金華人弘治壬戌
進士授兵科給事中有汪鈺者故太監汪直

義男也乞陞錦衣衛鎮撫帶俸守陞希曾疏奪之
曰內官本無後而強求世祿之恩義男本異姓而
欲冒他鬼之蔭疏上中官切齒復因災異陳八事
語皆剴切直指近倖由是逆瑾謀中傷之正德丁

卯差往湖貴二省計處邊儲時瑾餒方熾凡差者必重賂蘄免禍有司為備千金希曾毅然却之曰我為諫官不能為朝廷除惡我之罪也奈何復賂之瑾又風以多叅劾為賄地不從瑾大怒矯命下詔獄考訊杖闕下除籍為民瑾誅起工糾給事中時方營建二宮內官復請修葺太素殿天鵲房船塢諸役費累鉅萬希曾抗疏爭之不報還南太僕寺少卿滁和之民困於納馬希曾奏更折色民大稱便晉右副都御史提督南贛汀漳等處軍務惠州寇賴貴聚眾肆虐發兵洗其巢穴剄頭餘黨曾蛇仔等七巢並興遠近震恐希曾督兵進戰賊大敗俘馘千餘捷奏召為工部右侍郎值河溢於漕任事者興新河之役費且數十萬死者數千人而歲運不繼命希曾往浚事希曾以沛漕之淤塞因黃河之旁衝黃河之旁衝因上流之未疏宜疏支河以殺其勢築長堤以防其衝然後挑通沛漕自

無復淤之患乃築堤起單至沛凡百四十餘里不期年而功成沛漕流通歲運如故每河漲隄下水退沙迴民多耕作焉召改兵部侍郎卒贈兵部尚書

唐龍

獻徵錄字虞佐號漁石蘭谿人正德戊辰進士知郟城時荒甚龍使民貸粟於官而薄其息却

美餘以佐轉輸民用不困盜起燕齊間至郟龍督兵捕之斬首三百餘級賊怒合其黨大至龍發硤口長柄諸砲斃其驍銳賊乃遁拜監察御史寧庶人誅江西新免於兵歲荐饑龍以選往按賑災卹貧江西乃寧嘉靖丁亥拜太僕卿擢吏部左侍郎壬辰闕中饑而濟農數寇邊詔遷兵部尚書兼右都御史統制三邊兼理賑濟龍入闕奏平糶節用等十事民賴全活者二十餘萬濟農自將十萬衆犯安會龍擊敗之兵部上功會執政有忌龍者不報丙辰改刑部尚書劉東山與其徒乘時為奸利

至構問兩宮株連貴近吏坐忤不窮竟去者數十人龍獨以抵法無所懾九廟成疏大禮大獄諸臣名以請得赦歸者二十餘人尋改吏部卒贈少保諡文襄

戚雄

兩浙名賢錄字世英金華人正德辛未進士授建陽知縣調南海剏繁就簡植良剪惡治為百

粵最召拜南京監察御史巡江聞寧藩變起疾走儀真調兵要害為防守計上下長江歷暑雨風濤無所顧恤迄逆濠就縛始解嚴又奏免南京守備太監及條處河患疏運道足邊餉等事多見施行嘉靖六年疏劾李福達之克炤及郭勛之比黨以風聞妄奏逮問落職

錢學孔

金華府志字以時金華人嘉靖癸未進士授推官擢御史巡視京城畿內肅清奉差刷卷

疏五事切中時弊清軍蘇松等處奏行補伍之法差滿復奏置巡江設兵備等四事按順天上興革

四議俱見採納尋陞大理少卿僉都御史巡撫保定引疾歸歷官二十餘年蕭然四壁鄉人高其清節

程文德

兩浙名賢錄字舜敷永康人嘉靖己丑進士授翰林編修以言事忤旨廷杖下獄謫信宜

典史累遷兵部郎中上禦邊四事及車戰事宜多見採納擢南國子祭酒晉禮部左侍郎尋改吏部門無私謁直隸江南河南山東四省大饑開例納銀以便賑濟文德具奏救饑如救焚溺緩則何及聚銀為難米粟頗易乞隨民所有凡可以充饑者悉得輸官散給帝可其奏於是餉米粟者踵至四省之民得以全活大內歲例大祈文德撰釐詞多寓規諫忤上意奪官回籍卒萬歷初贈禮部尚書諡文恭分省人物考文德從楓山先生游授以誠篤自治之學又從陽明先生授良知訣歸籍聚徒

講學清苦若寒士卒不能葬總督胡宗憲贖之

王崇

金華府志字仲德永康人嘉靖己丑進士授吏科給事中寇犯寧夏總兵趙英逗留敗績欲以

賄脫崇奉命往正其罪謝駙馬侵馬場崇時巡青州發之貴戚畏其直出為廣東僉事轉山西副使備兵井陘親簡閱明賞罰兵雄諸鎮轉湖廣叅政諸苗陷印江崇破之遂聽約束陞貴州按察山西左布政巡撫山西以保障為急繕城厲兵倡勇敢嚴斥堠寇至輒以捷聞召貳本兵丁已湖廣川貴苗民犯順命崇以原官出鎮二年苗穴底定蔭一子致仕

趙志臯

獻徵錄字汝邁蘭谿人隆慶戊辰進士授翰林院編修萬厯初陞侍讀會張居正以父喪

奪情諸疏劾者皆暗激上怒廷杖竄戍而疏悉不付史局志臯以職掌堅請之使不得祕居正怒甚

遂出為廣東按察副使辛巳例察京僚黜官歸居
正卒起解州同知擢南京國子監司業歷官吏部
左侍郎陞禮部尚書兼東閣大學士時開採之使
四出志臯疏諫甚懇其臺省部僚因事激觸至斥
逐貶竄者營救無不
力卒贈太傅諡文懿

程正誼

舊浙江通志字叔明永康人隆慶辛未進士
司理武昌屬邑向無雉堞正誼建議築五城

分巡雲南時土司八百老搥等負固正誼開誠宣
諭遂悅服陞廣西叅政靖江王堯悍宗煽亂諭以
威德無敢譁者轉四川左布政三殿大工興採木
為厲正誼立折算法刊為書商民不因陞順天府
尹時蜀帑羨餘數萬金吏以請正誼毅然拒之
赴京以蜀扇不工罰及僚屬引罪自陳遂歸

黃卷

金華府志字惺吾永康人萬歷丁丑進士授中
書選河南道御史遇事敢言巡鹽長蘆請建學

滄州以處鹽商子弟癸巳下三王並封之詔建言
諸臣皆以批鱗削籍卷抗疏救之留中放歸光宗
登極詔起用而卷已歿子一鵬濟
南州同閤門殉難人稱濟美云

盧洪春

金華府志字思仁東陽人萬厯丁丑進士授
旌德令陞禮部主事皇三子生封母鄭氏為

貴妃洪春抗疏爭之帝不悅越數月孟冬當享太
廟傳旨遣官代祭洪春復具疏切諫帝益怒發午
門外杖六十褫職為
民卒後贈光祿少卿

徐學聚

金華府志字敬輿蘭谿人萬厯癸未進士任
浮梁知縣盜賊充斥霍鎮無賴多窟穴其中

學聚設法解散之調吉水會連年水旱斗米千錢
學聚多方賑濟民賴以生擢吏科給事中疏請勤
召對建元良蚤諭教出為湖廣僉事陞福建布政
奸民吳建糾白蓮教數千人謀叛將發學聚設計

擒之晉巡撫漳有守備劉某謀不軌廉知捕之伏辜奸商引紅毛泊彭湖求互市倚高稅監為奧援勢甚張學聚抗拒疏陳八誣五患毋輕縱致貽閩海禍高監擅利復疏其惡而以稅額歸有司後乞歸卒

姜應甲

舊浙江通志字叔乙金華人崇禎戊辰進士授行人選刑科給事中時冢宰缺員吏部侍

郎張捷以呂某對蓋魏忠賢黨也舉朝無敢言者應甲獨發其奸帝遂去呂名京師早方齋戒祈禱一夕有旨決罪囚應甲封還詔書帝不允嘆曰不得其言尚可留乎即以親老乞養歸會東陽許都反應甲傾家貲募死士迎敵於孝順街寇遂退晚乃披緇自號頑石結茅於北山巔年七十有六卒

國朝

朱之錫

鄉賢留祀冊字梅麓義烏人順治丙戌進士授弘文院編修歷遷兵部尚書兼右副都御

史總督河道時黃河秋決漕運維艱之錫竭力經營不避寒暑凡所修築無不悉心擘畫以圖經久凡夫役工程錢糧職守及諸利弊因革損益之宜一一條上幾數十疏俱覆議報可於是運艘無阻而近河之民得免水患壬寅歲祲山東淮南道殍相望之錫設法倡賑全活甚衆會奉

勅兼任

巡方剖決若神民無冤者在任十一年加太子

太保卒

賜祭葬

蔭一子瀕河之民立廟祀之

衢州府

宋

趙抃

宋史本傳字閱道西安人進士及第為武安軍節度推官以薦為殿中侍御史彈劾不避權倖

聲稱凜然京師目為鐵面御史其言務欲朝廷別白君子小人謂小人雖小過當力過而絕之君子不幸誣誤當保全愛惜以成就其德言宰相陳執中不學無術宣徽使王拱辰奉使不法皆罷去知益州地遠民弱吏肆為不法州郡公相餽餉抃以身帥之蜀風為變召為右司諫內侍鄧保信引董吉燒煉禁中抃引文成五利鄭注為比力論之陳升之副樞密抃言升之姦邪交結宦官進不以道章二十餘上升之去位抃亦罷知虔州虔素難治抃召戒諸縣令使人自為治令皆喜爭盡力獄以屢空召為侍御史改河北都轉運使時賈昌朝以故相守魏抃將按視府庫使來告曰前此監司未有按視吾藏者抃曰舍是則他郡不服竟往昌朝不悅初詔募義勇過期不辦官吏當坐者八百餘

人抃奏言河朔頻歲豐應募者少請寬其罪從之
坐者獲免而募亦隨足昌朝始愧服知成都以寬
為治蜀民大悅神宗立召知諫院及謝帝曰聞卿
匹馬入蜀以一琴一竊自隨為政簡易亦稱是乎
未幾擢叅知政事王安石用事抃屢斥其不便韓
琦上疏極論青苗法安石持之愈堅抃上言安石
強僻自用詆天下公論以為流俗違衆罔民順非
文過近者臺諫侍從多以言不聽而去司馬光除
樞密不肯拜且事有輕重體有大小財利於事為
輕而民心得失為重青苗使者於體為小而禁近
耳目之臣用舍為大今去重而取輕失大而得小
懼非宗廟社稷之福也奏入懇乞去位拜資政殿
學士知杭州改青州會成都以戍卒為憂遂以大
學士復知成都至蜀治益尚寬召卒長立堂下諭
之曰吾與汝年相若吾以一身入蜀為天子撫一
方汝亦宜清謹畏戢以率衆比戍邊得餘貲持歸

為室家計可也人喜轉相告莫敢為惡蜀郡晏然
乞歸知越州復徙杭以太子少保致仕元豐七年
薨贈太子少師諡清獻林長厚清修人不見其喜
愠平生不治貲業不畜聲伎日所為事夜必衣冠
露香以告於天不可告則不敢為也其為政善因
俗施設猛寬不同要之以惠利為本韓琦嘗稱林
真世人標表蓋以
為不可及云子岬

趙

岬宋史本傳字景仁由蔭登第通判江州改温州
神宗擢為御史以父老請外提舉兩浙常平元

祐中復為御史言治平以前大臣不敢援置親黨
子弟多處筦庫自王安石持內舉不避親之說以
子雱列侍從由是循習為常今宜杜絕其源又言
臺諫之臣或稍遷其位而陰奪言責或略行其言
而退與善地或兩全竝立苟從講解或置而不問
外示包容使忠鯁之士蒙羞難退皆朝廷所宜深

察也傳堯俞王巖叟梁燾孫升以事去岷言諸人才能學術為世推稱忠言嘉謨見於已試宜悉召還朝所言皆切時務元符中歷鴻臚太僕少卿卒

王渙之

宋史新編字彥舟常山人未冠擢上第歷官太學博士徽宗立以日食求言渙之用大臣

薦召對稱旨欲任以諫官辭曰臣由大臣薦不可居是官累擢中書舍人崇寧中進吏部侍郎以寶文閣待制知廣州言者論渙之當元祐末與陳瓘游解職入黨籍卒渙之恬於仕進每云乘車常以顛墜處之乘舟常以覆溺處之仕宦常以不遇處之則無事矣

毛

注

宋史本傳字聖可西安人舉進士大觀中權殿中侍御史蔡京免相留京師注疏其擅持威福

引凶朋林摠置政府用所親宋喬年尹京其門人播傳咸謂恩眷不衰行且復用京遂致仕四年彗

再見注又言京罪積惡大天人交譴宜早令去國以消弭災咎京始出居錢塘注尋遷左諫議大夫

徐嘉

弘治衢州府志字吉卿西安人宣和進士以趙鼎薦除教授王邸累遷侍御史擢貳戶部兼權

吏部尚書言者論其有黨上曰嘉朕親擢安得是紹興三十二年金使請和命嘉館伴既覲金使不肯以書授中使嘉徑前奪書以進上嘉之孝宗登極以舊職守泉徙帥越俄進職守平江高宗語孝宗曰是嘗手奪國書者詔過闕覲兩宮至蘇踰年致仕

劉章

宋史本傳字文孺龍游人紹興十五年廷對第

一遷祕書郎兼王府教授事以經誼文字啟廸掖導秦檜當國嫌不附已諷言者媒孽其罪出倅筠州檜死擢祕書少監議郊廟禮文當置局討論詔行其說孝宗受禪念舊學拜禮部侍郎奏禁過淫祀進權禮部尚書對選德殿問章今年幾而容

貌未衰頗嘗學道否章對曰臣書生無他長惟菲
儉自度晏嬰一狐裘三十年人以為難臣以為易

上嘉嘆久之以資政殿
學士致仕卒諡文靖

鄭仲熊

兩浙名賢錄字行可西安人登進士第歷官
簽書樞密院拜叅知政事時秦檜當國誣搆

趙令衿謗訕欲加重典高宗猶豫未決檜於上前
援仲熊助已言鄭仲熊與令衿同里備知其惡陛
下試叩之上顧仲熊仲熊正笏却立徐對曰臣雖
與令衿同鄉素不識其人檜失色令衿遂得免死
檜下殿忿色相誚亟諷言者劾仲熊與令衿密友
故飾為不知以欺陛下章上仲熊待罪都亭帝聞
之遣中使宣押是時執政去國者久不舉此恩例
特行之檜恚益甚復使臺諫交攻之仲熊遂力祈
避位以原官奉祠言者不置竟落職寓居蕭
寺二十年孝宗即位復端明殿學士致仕

梁弁

梁揔

弘治衢州府志弁西安人登進士第秦檜當軸以弁乃辟雍同舍召拜御史欲

使承風旨弁謂臺諫天子耳目安得為人作鷹犬終不附檜稱疾丐祠子揔字責全以明法擢廷評時有欲入人罪者揔堅執不見聽乃求去為淮西檢法林光朝薦之召丞大理稍遷少卿孝宗稱其忠正廉恪出為浙江憲平丹陽盜救嚴陵荒厯晉戶部侍郎使於金既還除刑部侍郎尋致仕

劉穎

宋史本傳字公實西安人紹興二十七年進士累官刑部侍郎以寶謨閣直學士致仕在孝宗

朝人臣爭承意自獻穎奏今日之失在輕聽人言昔之施為今復棄置大損盛德孝宗嘉納之光宗時論人主難克而易流者有四曰逸豫無節賜予無度儒臣易疎近倖易昵寧宗時學禁初起黨論日興穎奏願陛下御之以道容之以德不然元祐崇觀之事可鑒也其言皆切中於時

江溥

兩浙名賢錄字叔源江山人紹興十五年進士
歷遷右司郎中拜殿中侍御史資性忠亮疾惡

如讐多為當事所忌而上獨知之溥感知遇益明
目張膽無所諱忌魏郎親吏馬校嘗繕私居矯令
役民屋摧壓死者十三人傷者倍之閏月而上不
聞溥奉白簡彈之請以次第議罪上覽疏曰父子
之間人所難言不謂卿能如此亟從無
少忤於是權貴斂迹一時稱為真御史

余端禮

宋史本傳字處恭龍游人第進士知湖州烏
程縣民間賦丁絹錢率三氓出一縑不輸絹

而折其估每縑千錢後增至五千民不勝病端禮
以請於府事得上聞又自詣中書陳便宜歲捐絹
錢六萬時孝宗志在恢復端禮言謀敵決勝之道
有聲有實敵弱者先聲後實以警其氣敵强者先
實後聲以俟其機今日之事願陰設其備而密為
之謀觀變察時機之未至不可以先機之已至不

可以後上喜曰卿可謂通事體矣以為監察御史累遷吏部侍郎光宗立拜吏部尚書擢同知樞密院事興州帥吳挺死端禮謂趙汝愚曰吳氏世握蜀兵今若復令承襲將為後患汝愚是其言合辭以奏不聽後挺子曦以蜀叛如端禮言汝愚去右丞相位端禮代之始端禮與汝愚同心共政汝愚嘗曰士論未一非余處恭不能任及韓侂冑寢竊威柄端禮不能遏但長吁而已在相位期年頗擁護善類然為侂冑所制壹鬱不愜志稱疾求退卒諡忠肅

劉甲

宋史本傳字師文其先東光人父著葬龍游因家焉淳熙二年進士累官至樞密院檢討使金

還擢權工部侍郎除知江陵府移知興元府利東安撫使時程松為四川宣撫使吳曦副之蜀口出師敗劬曦已遣人獻四川於金金鑄印立曦為蜀王甲未至鎮金人破大散關甲告急於朝乞下兩

宣撫司協力松謀遁甲固留不可賊以書致甲甲援大義拒之因卧疾賊又遣其弟邀甲相見甲叱去之乃欲自拔歸朝先募二兵持帛書遺叅知政事李璧告變曦僭王位甲遂去官璧袖帛書進上覽之稱忠臣者再召甲赴行在甲舟行至重慶聞安丙等誅曦復還漢中上奏待罪詔趣還任甲奏叛臣子孫族屬及附偽罪狀公論快之會楊巨源死軍情叵測除甲宣撫使未幾金自鵲嶺關進屯八里山甲分兵進守諸關截潼川戍兵駐饒風以待之金人知有備引去拜寶謨閣學士賜衣帶鞍馬西邊諸事多於甲取決會罷宣撫司合利東西為一帥治興元甲進知興元府利路安撫使權四川制置司事先是大臣撫蜀諸將有互送禮甲下令首罷之凡安丙所立茶鹽柴邸悉廢丙增多田稅甲命屬吏討論由一府言之歲減凡百六十萬緡米麥萬七千石邊民感泣嘉定七年卒於官理

宗詒諡

清惠

徐霖

宋史本傳字景說西安人淳祐四年試禮部第

一授沅州教授時宰相史嵩之挾邊功要君植黨嵩國霖上疏歷言其奸深之狀以為其先也奪陛下之心其次奪士大夫之心而其甚也奪豪傑之心疏奏見者吐舌未幾嵩之匿喪求起復君子並起攻之上大感悟思霖之忠擢祕書省正字會日食應詔上封事遷校書郎七年夏大旱霖應詔言諫議大夫不易則不雨京兆尹不易則不雨不報改宣教郎霖屢辭曰向為身死而不敢欺其君父今以官高而自眩於平生失其本心何以暴其忠志十二年授祕書省著作郎累辭不許兼宗政殿說書乃言葉大有陰柔姦黠為羣儉冠不宜久長臺諫乞斥去兼權左司霖知無不言於是讒嫉思以中傷而上亦不悅乞外知撫州以言去開慶

元年差主管崇禧觀景定二年知汀州卒度宗賜祭田百畝以旌直臣

徐夢鱗

衢州府志字樂水常山人紹定己丑進士初任江陵簿累官至御史蕭山尉丁大全劾緣

入臺夢鱗抗疏沮之不得遂謝病致仕

胡大昌

萬厯龍游縣志字師言端平二年進士授衡州教授歷戶部侍郎理宗嘗曰若大昌行事

朝廷何患不治度宗立內侍盧董用事抗章累劾不報出為太平守京北轉運使

明

鄭辰

獻徵錄字文樞西安人永樂進士授監察御史江西福安民有告謀逆事辰往廉得其誣狀抵

以罪谷庶人有異謀遣辰陰察之比還語其不軌之狀甚悉上語尚書方賓曰是真國家耳目臣矣

尋擢山西按察使潞州盜起朝廷欲遣兵往討辰謂此貧民懼徭役竄入山谷間者不宜加兵乃躬往撫諭遂皆安業召陞工部左侍郎奉勅濬漕河有言宜自入名開渠通衛河以便行舟辰以勞民奏罷之正統中陞兵部左侍郎以疾致仕

鄭林

兩浙名賢錄字伯森常山人正統進士景泰初授兵科給事中遇事敢言權貴無不斂跡嘗抗疏論團營將不知兵操練無法當事者請委林操練軍士林以軒轅破蚩尤之陣教閱軍伍復具疏繪圖以進曰黃帝按井田作陣法大軍歸中專主旗鼓八節旋繞悉聽指揮若正北受敵則東北西北為奇兵張左右翼以援之正南受敵則東南西南為奇兵張左右翼以援之其正東正西及四隅受敵亦如之所謂常山之蛇擊首則尾應擊尾則首應擊中則首尾俱應者也時于謙為大司馬深

嘆賞以為得古兵法之秘奏請頒其法於天下凡練兵官悉以是教閱隊伍始整其法至今不廢

徐鑾

衢州府志字用和開化人景泰甲戌進士任監察御史刷卷江西廉公嚴明權貴不敢干以私

時稱為風

憲第一

樊瑩

獻徵錄字廷璧常山人天順甲申進士擢監察御史山東盜起奉璽書追捕不旬日得其渠首

以歸清理淮揚軍所條畫事宜至今為例出知松江府松賦重役繁弊蠹百出其大者運夫耗折稱貸積累而倉場書手侵盜害人衆皆知之未有以處瑩至晝夜講畫盡得其要領曰運之耗以衆皆齊民靡所統一利歸於猾害及善良而夏稅軍需糧運綱用與凡供應等費皆出自秋糧餘米既收復糶展轉迂回此弊所由生也乃請革民夫俾糧長自運而寬其綱用以優之除常運本色外其當

變易者盡徵白銀見數支遣於是積年之弊十去八九巡撫下其法於他州俾悉遵之以母憂去弘治初起知平陽府擢河南按察使時河溢境內漂流數萬家瑩躬請賑卹所全活甚衆陞應天府尹守備蔣琮怙寵作奸與言官奏訐連歲蔓引甚衆而事終不決瑩承命推鞠初若不與異者琮覘知之不為意最後及山陵龍脉事琮遂得罪去瑩在府屢治大獄舉法不苛陞南京工部侍郎尋改左副都御史巡撫湖廣錦田賊與兩廣獍獍為寇聚衆幾三萬瑩謂賊不可盡殺不開其生路將致死於我乃下令除首惡餘悉貰不問賊聞之稍稍散去遂得倡亂十八人置之法而牒其餘歸本貫一方以寧改南京刑部左侍郎兼左僉都御史巡視雲貴時瑩年幾七十單車屏從躬訪利病奏劾鎮守及巡撫官罪狀黜不職文武吏七百餘員威惠大行召為南京刑部尚書致仕卒贈太子少保諡

清簡

王璣

獻徵錄字在叔西安人嘉靖己丑進士拜兵科給事中上疏論時政乞分內閣重權以防壅蔽外補山東按察僉事遷江西叅議屬歲歉饒之樂平業瓷浮梁者輒盜兵讐殺璣廉得其情先為曉諭乃拘逮首禍者置於法餘並解散轉山東按察副使兵備天津沿河奸人悉駕小艇名假貿鹽實窺便攘刦被害者莫能指實璣為籍其船戶官為編類令船尾各畫一禽以相識別許徑指其船禽以訴盜無弗得河道肅清陞福建叅政進右僉都御史充淮徐兗等處招撫營田使所屬五府三州久罹災歉千里蕭條璣節浮費勤勸課流民復業者四萬二千九百有奇所墾田地八千頃凡厯再期漸就緒而以言官論列裁革添設重臣回籍聽用遂歸儒林錄別號在菴少時聞陳白沙之學心

亟仰之渡江受業陽明之門陽明稱其篤實補山東按察僉事輒進諸生論學齊魯士彬彬向風家居以禮為訓每身先之接後學溫然若家人年七十餘卒嘗言平生無過人處唯出處分明未嘗屈

身降志云

毛愷

獻徵錄字達和江山人嘉靖乙未進士授監察御史以言事與執政忤左遷寧國府推官陞南

工部主事抽稅蕪湖關蕪湖當荆湖下流商稅不貲愷獨勵清操出納委之縣佐稅銀貯之縣庫一毫不染其歲額之盈者則蠲以與商商咸頌之歷員外郎中陞瑞州府知府瑞俗多囂訟且多積逋愷率以禮義而申之禁令怙終不馴者始繩之以法追積逋必寬其期限度貧甚者則以俸餘代為之償民感激若更生陞左僉都御史巡撫保定擢左副都穆宗嗣位改刑部尚書嚴飭邦禁慎獻

刑獄中貴不法則抗疏極論請發部問擬以彰公道其以過誤繫獄者亦為之疏請明示犯由以昭勸懲疾作乞休歸卒贈太子少保諡端簡愷性喜講學躬行實踐一以養心寡欲為主先儒語錄罔不參訂其異同究極其歸趣歷官二十四任終始一節所著有讀書錄抄釋二卷文集四卷奏議八卷享年六十有五

趙鏜

丁元復趙鏜傳字仲聲江山人嘉靖丁未進士授河南道御史督長蘆釐政時軍興需鹽課急

鏜悉心經理尋究弊端條上封事皆中肯綮改應天巡按慎舉刺勵風裁威名大振提督南畿學政號稱得士擢順天府丞時方缺尹諸務蝟集鏜以臺臣夙望飭典法繩之大府帖然無敢闌出入者改大理少卿擢右僉都御史穆宗改元以疾乞歸

徐世蔭

衢州府志字爾繩開化人天啟乙丑進士授南兵部主事時三王並封供具百億世蔭措

置井井大司農鄭三俊欲清屯田之冒濫者諸軍詳而圍其署世蔭單騎諭散之歷遷按察司副使

備兵常鎮宜興民變白晝攻剽官不能禁或請勦

之世蔭曰此亂民非寇也為開陳禍福間取不職

三者剿懲乏事遂寧息陞福建按察使未幾巡撫安

廬署浙江通志安廬流寇披猖世蔭晝夜登陴調

兵接餉日無寧晷民恃以無恐解

任家居以孝友敦樸式訓鄉里

余日新衢州府志字君又龍游人崇禎甲戌進士知

漳浦縣有善政擢監察御史巡按山東時山

東方被兵謀國者日督綱課不已日新奏請蠲逋

緩徵疏凡三上又陳三府俵馬之害止闕寧米豆

之供停登萊海運之議議者

避之尋加太僕卿予告歸

浙江通志卷一百六十一

欽定四庫全書

史部

浙江通志卷一百六十二

詳校官給事中臣戴璐

檢討臣德生覆勘

總校官編修臣倉聖脉

校對官庶吉士臣潘庭筠

謄錄監生臣李崇實

欽定四庫全書

浙江通志卷一百六十二

人物

名臣

五

嚴州府

宋

江公望

宋史本傳字民表睦州人舉進士建中靖國元年拜左司諫時內苑稍蓄珍禽奇獸公望

力言非初政所宜他日入對帝曰已縱遣之矣惟一白鵬畜之久終不肯去帝以拄杖逐鵬乃刻公

望姓名於杖頭以識其諫蔡王府史以語言疑似成獄公望極言論救出知淮陽軍蔡京為政編管南安遇赦還家卒建炎中贈右諫議大夫

胡國瑞

兩浙名賢錄字嘉言壽昌人登崇寧二年進士第以博洽稱大觀初命修九域志除編修

官時奔競成風國瑞獨以在館為樂不覬他徙高宗時累官至吏部侍郎與秦檜為姻家而力排和議乞斬檜以謝天下間者股栗求外補知舒州致仕家居開義學置贍士田鄉人名其田曰義坂

王縉

嘉靖浙江通志字子雲分水人崇寧進士累官監察御史遷右司諫每謂人才實難多事之際

宜為朝廷愛惜以故不專彈擊惟論安危大計與所以啓沃君心者君子謂得諫臣體尋乞外知溫

州復知常州罷歸

葉義問

宋史本傳字審言壽昌人建炎初登進士第為饒州教授攝郡事歲旱以便宜發常平米

賑民提刑黃敦書劾之詔勿問遷知江寧縣召秦檜所親役同僚不可義問曰釋是則何以服他人卒役之尋通判江州豫章守張宗元忤檜或中以飛語事下漕臣張常先時宗元道九江常先檄義問拘其舟義問投檄曰吾寧得罪不為不祥常先白檜遂罷去檜死召擢殿中侍御史樞密湯鵬舉效檜所為植其黨周方崇李庚置籍臺諫鋤異已者義問累章劾鵬舉并方崇等皆罷之遷吏部侍郎尋拜同知樞密院事金有犯邊意義問奉使覘之還奏彼造舟船備器械其用心必有在宜屯駐沿海要害備之金主亮果南侵命視師已而亮死師退義問還朝力請罷職嚴陵志孝宗即位封新安郡侯卒

諡忠簡

馬大同

新定續志字會叔郡人紹興二十四年進士自為小官即以剛介聞改秩除國子監簿對

便殿上與語明日謂宰執曰夜來馬大同奏對朕與之辨論氣節可喜由是簡知孝廟有大用意後每對上輒陳恢復大計歷中外要官必求盡職以洗冤澤物為已任仕至戶部侍郎

汪自強

兩浙名賢錄字行之淳安人紹定二年進士為富春簿分司鄉邑創常平義倉知錢塘縣

時值孟饗赤縣出班起居上目送之除監察御史兼崇政殿說書京尹顧岳託婚東宮以希內授自強露章劾之岳坐免官婚亦寢朝野悚然尋遷大理寺卿乞身歸

明

洪璵

萬歷嚴州府志字宗器淳安人永樂辛丑進士授刑部主事改工部所至有聲正統初以楊士

奇薦陞吏部左侍郎毅然以進退人
才為已任人不敢以私謁朝廷重之

項文曜

嚴陵志字應昌淳安人宣德癸丑進士觀政
兵部尚書王驥奇其才俾修馬政復奉使西

洋所至民不擾而事治授兵部主事未幾征麓寇
及整飭遼東邊備皆著勞效尋除本部郎中正統
十四年陞右侍郎轉吏部左侍郎兼詹事文曜持
已蒞官並以勤敏清慎著聞天順初被誣終於家
成化五年詔復官賜諭祭其文有
云頃罹誣構事已昭雪其事始白

姚夔

獻徵錄字大章號損菴桐廬人正統壬戌會試
第一擢吏科給事中首疏八事多見采納景泰

庚午用薦超擢南京刑部侍郎時刑部規矩廢弛
夔一以嚴肅持之獄無滯囚英宗復位調禮部未
幾調吏部有真定守以舊賄敗石亨挾勢囑復其
官同列附亨者會擬准藁來判夔擲筆大言曰吾

寧不做侍郎必不判此蒙事竟止亨敗附亨者皆降黜而夔遷禮部尚書明於典禮成化乙酉耕藉田幸太學皆從所請慈懿太后崩中旨議別葬事下禮部夔率羣臣覆奏曰山陵宗廟聖孝所先綱常典禮國家攸重萬一合葬祔廟之禮少有疑沮關係非細豈能保其將來無據禮改正者上覽奏感動卒從其議遷吏部尚書釐正庶務剗革宿弊品藻人物進退惟公卒贈少保諡文敏子璧字良甫天順進士官恩明府同知

商輅

湯斌商輅傳字弘載淳安人宣德中舉鄉試第一正統乙丑會試廷試皆第一除翰林修撰景

帝即位命入內閣叅預機務尋遷學士上皇居南宮錦衣指揮盧忠妄言告變中官阮浪被刑死猶窮治不已諸大臣無敢言者輅獨奏曰不可聽宵人以傷大倫帝悟乃誅忠遷兵部左侍郎景帝不

豫輅與禮部尚書姚夔請復立沂王為太子不許輅援筆曰陛下宣宗章皇帝之子當立宣宗章皇帝之孫聞者感動以日暮奏未及入而是夜石亨等已奪門迎上皇復位諸大臣多見誅竄輅亦下獄久乃得旨奪官為民憲宗立三年特召至京命復原官仍入內閣是時大學士彭時當國慈懿太后之喪輅與時力持得祔陵廟如禮會御史林誠等詆輅不當用上欲罪誠等輅曰臣嘗請優容言者奈何因論臣復責言者乎上喜曰輅真大臣也進戶部尚書兼大淵閣大學士嘗召見語及景泰間事輅極言景泰有社稷功帝號當復上遂下詔復景帝廟號祭禮如諸陵悼恭太子薨時紀妃有子六歲矣畏萬貴妃莫敢言久之左右稍聞於上上立召見留宮中而紀妃仍居西宮輅恐貴妃不利於皇子思為保護計上疏請勅令移就近所俾母子朝夕接見而皇子仍藉貴妃撫育於是紀妃

遷永壽宮輅又請出皇子示羣臣勅禮部擬名以聞越數日上自率皇子御文華門輅趨御前頓首曰陛下踐阼十年儲位尚虛天下臣民引領望久矣當卽立為皇太子安中外心帝頷之逾月紀妃薨輅請如宋李宸妃故事殯葬諡號悉如禮是年冬皇太子立加輅太子少保改吏部尚書黑胥見疏弭災八事尋進謹身殿大學士時汪直督西廠恃寵數興大獄輅率閣臣條直十罪言非速罷伺察之司天下安危未可知也上愠曰一內豎何遽危天下誰實主此奏者太監懷恩傳旨詰責甚厲輅正色曰朝臣無大小有罪皆請旨逮問直敢擅收三品以上京官大同宣府邊城要害守備緩急不可缺直敢一日擒械數人南京祖宗根本地留守大臣直敢擅自收捕諸近侍在帝左右直敢輒易置直不去天下安得不危懷恩咋舌退是日遂罷西廠然直雖不視廠事而寵幸如故會故大學

士楊榮曾孫有罪為直所發語連輅直又從中間之輅遂力求去加少保馳傳歸家居十年卒贈太傅謚文毅子良臣成化二年進士官至翰林侍講

何陞

萬厯嚴州府志字文達淳安人正統戊辰進士拜戶科給事中正統末朝廷方有事朔漠命陞

與御史楊春趙運邊餉晝夜兼行不避危險已而也先效順正統駕還與同官李侃抗章請備禮郊迎詞極懇至識者韙之戶部尚書金濂會計軍興財用議更稅畝之法將天下夏稅秋糧混同科收以紓急用陞執奏不可事遂寢天順六年陞河南管河右叅議時黃河為患陞相其便宜疏通沁水下流使復舊道漕運無虞軍民賴之

胡拱辰

兩浙名賢錄字共之淳安人正統己未進士知黟縣召拜御史厯陞廣西右布政會兩廣

猥人作亂協同總兵勦平之陞右副都御史提督
操江連年刼江巨盜皆以次捕獲江徽肅清進南
兵部侍郎時孝宗春秋方盛儲位尚虛拱辰首上
言前星遂定陞南工部尚書議修內府寢殿所需
之材估用五十一萬有奇拱辰以江南旱澇相仍
民力弗堪覆議得省什一乞歸卒贈太子少傅諡
懿莊

宋旻

嚴陵志字弘澤淳安人景泰辛未進士授大理
寺評事轉左寺正獄訟經所讞者皆自以為無

冤歷陞本寺卿平反數多聲譽益著陞右都御史
總督兩廣殄滅蠻寇恩威並著弘治元年致仕

徐貫

兩浙名賢錄字原一淳安人天順丁丑進士授
兵部主事進郎中黔國公沐琮奏請節制三司

貫曰黔國世守滇南爵列上公恩寵殊厚而不使
節制三司者蓋有深意也不見唐之藩鎮乎事遂

寢尋擢福建右叅議分守延平值民饑多方設法
出官廩減價以拯恤之歷陞右副都御史巡撫遼
東時鎮守總兵多佔軍丁為佃戶者悉奪歸還屯
處置邊方俱有條緒將吏畏服陞工部右侍郎轉
左蘇松水患貫奉勅往治之簡委有司畫地分理
授以方畧水患悉平晉尚書累加太子少保乞歸
卒贈太保
諡康懿

徐懷

嚴陵志字明德建德人天順庚辰進士授刑部
主事歷陞至南京刑部右侍郎居官勤慎所至

洗冤澤民歷任三十餘年無錙銖之
積以遺子孫清白之操無愧古人云

徐節

壽昌縣志字時中成化進士授內鄉知縣時歲
荒民死者枕藉節集巨室貸萬石活若干人尋

擢御史上疏數錦衣指揮牛循罪劾宰臣萬安等
出知太平府進雲南叅政破梁山竹箐諸賊遷廣

西布政征思恩又捷陞右副都御史巡撫山西簡車徒蓄財穀邊鄙晏然以忤逆瑾歸瑾誅復職致仕

王浚

分省人物考字德深建德人正德戊辰進士授薊州知州以事忤逆瑾逮錦衣獄瑾誅乃釋陞

刑部員外郎武宗南巡同諸僚疏諫廷杖幾斃出為山東按察僉事進貴州兵備副使土夷吳尚賢搆亂設方畧擒之地方以寧陞陞右副都御史提督南贛軍務奉宣德意申以威嚴數年間軍旅不興帑儲大省進刑部右侍郎致仕

毛一公

遂安縣志號明齋萬厯己丑進士授漢陽府推官有政聲行取工科給事中時國本未定

上疏力爭罷歸里居二十餘年光宗改元擢尚寶司丞陞南光祿寺少卿

毛一瓚

嚴州府志字獻卿遂安人萬厯壬辰進士觀政禮曹時有倡三王並封之議者一瓚手疏

爭之議尋寢初授進賢令以治最召拜文選主事厯遷正郎凡司大計者一掌選者三杜苞苴絕請托銓政一清疏陳選法十餘條皆切中時弊以忤權貴托病歸

姜習孔

遂安縣志字素臣萬厯丁未進士宰沅陵調繁無錫奏最擢南吏科給事中司內外計典

宿弊頓革奏蠲南直隸鋪設三殿錢糧百六十萬客魏擅政以疏糾內臣冒蔭奪職為民崇禎改元起南大理寺丞晉鴻臚寺卿謝病歸

溫州府

宋

許景衡

宋史本傳字少伊瑞安人元祐九年進士宣和六年召為殿中侍御史時童貫為河東北

宣撫使將北伐景衡論其貪繆不可用者數十事不報睦寇平江浙郡縣殘毀而茶鹽比較之法如故景衡奏茶鹽之法當以食之衆寡為歲額之高下今收復之後戶版半耗民力蕭然而茶鹽比較不減於昔民欲無困得乎奏入詔兩浙江東路權免茶鹽比較朝廷既興燕雲之師調度不繼誅求益急景衡奏不急之務若營繕諸役花石綱運其名不一吏員猥多軍額冗濫又無名功賞非常賜予皆夤緣傲倖干請無厭宜節以祖宗之制且極論和糴鹽法之害不報高宗即位除御史中丞宗澤為東京留守言者附黃潛善等多攻其短欲逐去之景衡奏曰澤赤心為國今若較其小短不顧盡忠之節則不恕已甚且開封宗廟社稷所在苟欲罷澤必遣留守不識縉紳中威名政事有加於

澤者乎疏入上大悟封以示澤澤乃安杭州叛卒
陳通作亂浙西提刑趙叔近招降之請授以官景
衡曰官吏無罪而受誅叛卒有罪而蒙賞賞罰倒
置莫此為甚卒奏罷之除尚書右丞有大政事必
請問極論黃潛善汪伯彥以景衡異已共排沮
之罷為資政殿大學士提舉洞霄宮卒諡忠簡

陳楠

宋史本傳字季任平陽人政和二年廷對第三
紹興初為金部郎中時言事者率毛舉細務楠

抗言今當專講治道之本修正事以攘敵國不當
以細故勤聖慮又言刺史縣令不能得人乞選監
司重其權久其任尋以楠知襄陽府充京西南路
安撫使金房兵叛楠遣將平之而後以聞襄漢兵
火之餘民物凋瘵楠請於朝以今之戶數視承平
時纔二十之一而賦須尚多乞重行蠲減漢水決
溢漂蕩廬舍楠躬率兵民捍築提岸賴以無虞改
知廣州充廣南東路經畧安撫使以疾乞祠卒

吳表臣

宋史本傳字正仲永嘉人大觀三年進士累官右正言高宗詔臺諫條陳大利害表臣請

措置上流以張形勢安輯淮甸以立藩蔽擇民兵以守險阻集海船以備不虞其策多見用遷吏部尚書時秦檜欲令使金議地界指政事堂曰歸來可坐此表臣不答又以議大禮忤意罷去晚號湛然居士自奉無異布衣時鄉論推其清約

婁寅亮

宋史本傳字陟明永嘉人政和二年進士為上虞丞建炎四年高宗至越寅亮上疏云屬

者椒寢未繁前星不耀乞遴選太祖諸孫有賢德者視秩親王以待皇嗣之生退處藩服并選宣祖太宗之裔材武可稱之人升為南班以備環衛帝讀之感悟擢監察御史時相秦檜惡之諷言者論罷職

薛徽言

宋史本傳字德老溫州人登進士第紹興二年遣使分行諸路徽言以權監察御史宣諭

河南時郴道桂陽旱饑徽言請於朝不待報即諭漕臣發衡永米以賑而以經制銀市米償之擢起居舍人秦檜與金人議和徽言疏爭之一日檜於上前論和徽言直前引義固爭反復數刻後中寒疾卒

林季仲

兩浙名賢錄字懿成永嘉人登宣和進士調婺州兵曹遷仁和令建炎初杭卒亂季仲躬

率弓手土兵捍截有功改宣教郎高宗幸永嘉中丞趙鼎薦為臺官及鼎輔政累遷吏部郎面對乞重縣令之選願從陛下乞一令以自効又云臣承乏郎曹求為縣令似不情者然官職輕重惟陛下如何以省部為重則重在郎官以斯民為重則重在縣令郎官出宰百里請自臣始尋除太常少卿

鼎罷相亦出知泉州鼎再相乃除檢正時秦檜主和議季仲上疏引夫差勾踐事爭之大忤檜意罷去久之起知婺州處州復以直祕閣奉祠

張闡

宋史本傳字大猷永嘉人宣和六年進士紹興

十年除祕書省正字遷祕書郎秦檜每薦臺諫必先諭以已意嘗謂闡曰祕書久次欲以臺中相處何如闡謝曰丞相見知得老死祕書幸矣檜默然竟罷主管台州崇道觀起吏部員外郎孝宗在王邸帝妙選官寮謂莊重老成無踰闡者改命祠部兼王府贊讀孝宗即位權工部侍郎兼侍講海陵王殂復求和再議遣使闡言宜嚴遣使之命正敵國之禮彼或不從則有戰耳如是則中國之威可以復振是冬給札侍從臺諫條時務時應詔數十人惟闡與國子司業王十朋指陳時事斥權倖無所回隱隆興元年真拜工部侍郎俄報王師收

復靈壁闡慮李顯忠邵宏淵深入無援奏請益兵
殿後已而果失利衆論歸罪於戰闡曰諸將無援
而敗當矯前失安可遽沮銳氣帝壯其言益出御
前器甲付諸軍軍聲復振時數易臺諫闡力言之
帝曰好名如某人但欲得直聲而去闡曰唐德宗
疑姜公輔賣直陸贄切諫願陛下深以為鑑金人
求和帝與議闡曰彼欲和畏我耶愛我耶直款我
耳力陳大害不可許帝曰朕意亦然姑隨宜應之
帝記賣直之語謂胡銓亦及此朕非拒諫者辨是
非耳闡曰聖度如天奈何與臣下爭名帝曰卿言
是也除工部尚書金以書通好所請三事國書歲
幣議已定惟割唐鄧海泗未決衆言紛紛不已闡
謂不與四州乃可通和議論先定乃可遣使今彼
客我主金勢已衰何必先示以弱朝論譴之引疾
乞骸乃除顯謨直學士提舉太平興國宮陞辭帝
問所欲言闡奏許和則忘祖宗之讐棄四州則失

中原之心遣歸正人則傷忠義之氣惟陛下毋忘老臣平昔之言其指時事尤諄切加賜金犀帶特許佩魚居家踰月卒贈端明殿學士朱熹嘗言秦檜力主和議摧折忠臣義士之氣遂使士大夫懷安成習至癸未和議則知其非者鮮矣朝論問有建白其言金人世讐不可和者惟胡右史銓張尚書聞耳

沈大廉

兩浙名賢錄字元簡瑞安人建炎進士歷遷樞密院計議官紹興更化拜監察御史遇事

敢言無所顧望給事中周葵以封駁忤旨去職大廉力陳其不可無何中書舍人凌景夏相繼去大廉復力言之俱不報自以不得其言求補外除直秘閣福建提刑一時公議翕然歸重

王十朋

宋史本傳字龜齡樂清人秦檜死上視政策士擢為第一授紹興府簽判或以書生易之

十朋裁決如神吏奸不行召為祕書郎兼王府小學教授十朋輪對言權雖歸於陛下政復出於多門是一檜死百檜生也上嘉納秦檜久塞言路至是十朋與馮方胡憲查篇李浩相繼論事太學生為五賢詩述其事除著作郎孝宗受禪拜司封郎中累遷國子司業言人主有大職三任賢納諫賞罰是也上嘉之除起居舍人升侍講每見必陳恢復之計及將北伐上疏曰靖康之禍亘古未有陛下志在興復奈何大臣不能仰副願戒在位者去附和之私心贊國家之大計則中興日月可冀因論史浩八罪曰懷奸誤國植黨盜權忌言蔽賢欺君訕上上為出浩史正志與浩族異拜浩而父事之十朋論宜黜正典刑林安宅出入史浩龍大淵門盜弄威福至是詐病求致仕十朋并疏其罪皆罷去張浚出師復靈壁虹縣又復宿州會李顯忠邵宏淵不協王師失律浚上表自劾主和者乘此

唱異議十朋疏言臣素不識浚聞其誓不與敵俱生心實慕之今浚遣將取二縣一月三捷及王師一不利橫議蠱起臣謂今日之師為祖宗陵寢為二帝復讎為二百年境土為中原弔民伐罪非前代好大生事者比陛下固不以一劔為羣議所挫然異論紛紛浚既待罪臣其可尚居風憲之職乞賜竄殛改除吏部侍郎力辭出知饒州移夔州又移湖州請祠去起知泉州凡歷四郡布上恩卹民隱所至人繪而祠之東宮建除太子詹事力疾造朝疾革累章告老以龍圖閣學士致仕命下而卒紹興三年諡忠文子聞詩聞禮皆篤學自立聞詩知光州提點江東刑獄聞禮知常州江東轉運判官為治能守家法

胡襄

兩浙名賢錄字季皋永嘉人登紹興第隆興初以王十朋薦除江西提刑召對備言宣靖間事

臣實親見豈惟廟謨外失亦由人心內離願陛下
覽觀覆轍備而後動孝宗傾聽除太常少卿兼樞
密都承旨左相陳俊卿雅相敬重襄每燕見必舉
當世弊事與政所宜先者俊卿喜其助已益重之
除直徽猷閣江東提刑移福建卒襄早學於胡安
國固已一出於正晚復交朱子由是體用浹洽本
末純粹朱子嘗語人曰永嘉前一輩人
物究竟終別蓋指劉許以後及襄也

薛季宣

宋史本傳字士龍永嘉人起居舍人徽言之
子年十七起從荆南帥辟書寫機宜文字時

江淮仕者聞金兵且至皆預遣其孥而繫馬於庭
以待季宣獨留家與民期曰吾家即汝家即有急
吾與汝皆死民亦自奮乃行保伍法置樓置戍訖
兵退人心不搖召為大理寺主簿未至會江湖大
旱流民北渡江宰相虞允文白遣季宣行淮西收
以實邊季宣為表廢田相原隰復合肥三十六圩

立二十二莊於黃州故治東北以戶授屋以丁授田凡為戶六百八十有五分處合肥黃州間謂人曰吾非為今日利也合肥之坪邊有警因以斷柵江保巢湖黃州地直蔡衝諸莊輯則西道有屏蔽矣還言於孝宗曰近或以好名棄士大夫好名特為臣子學問之累人主為社稷計惟恐士不好名誠人人好名畏義何嚮不立帝稱善進兩官除大理正自是奏請論薦皆報可出知湖州會戶部以歷付場務鎔錄皆分隸經總制諸郡束手無策季宣言自經總制立額州縣鑿空以取贏雖有奉法吏思寬弛而不得騁若復額外征其強半郡調度顧安所出殆復巧取之民民何以勝戶部譙責愈急季宣爭之愈強臺諫交疏助之乃收前令改知常州未至卒

薛叔似

宋史本傳字象先其先河東人後徙永嘉游太學解褐國子錄初登對論自熙寧來賦日

增而民困滋甚孝宗嘉納遷太常博士時倣唐制
置補闕拾遺上自除叔似左補闕光宗受禪進權
兵部侍郎兼國用司叅議官兩浙民有身丁錢叔
似請於朝遂蠲之韓侂冑開邊除兵部尚書侂冑
誅謫福州久之許
自便卒諡恭翼

何溥

兩浙名賢錄字通遠永嘉人試禮部第一登紹
興進士第歷臨安府學教授授刪定官出通判

婺州忤秦檜罷檜死以薦除監察御史遷右司諫
彈劾不避除諫議大夫首論將帥不治兵而治財
戰鬪之士變為商賈繼劾鎮江都統制劉寶及吏
部侍郎沈介又率同列攻丞相湯思退俱罷之在
言路六年知無不言號為稱職除
翰林學士兼吏部尚書以疾卒

徐誼

宋史本傳字子宜一字宏父溫州人乾道八年
進士累官太常丞孝宗臨御久事皆上決執政

惟奉旨而行羣下多恐懼顧望諫曰若是則人主曰聖人臣曰愚陛下誰與共功名乎及論樂制誼對以宮亂則荒其君驕商亂則陂其臣壞上改容曰卿可謂不以官自情矣寧宗即位遷權工部侍郎侂冑恃功以賞薄浸觖望誼告汝愚曰異時必為國患宜飽其欲而遠之不聽汝愚雅器誼除授建明多咨訪之誼隨事裨助不避形迹侂冑疑將排已益怨恨以御史胡紘疏責南安軍安置卒後諡忠文

蔡幼學

宋史本傳字行之瑞安人年十八試禮部第一孝宗策士是時外戚張說用事幼學對策

曰陛下使姨子預兵柄其人無一才可取宰相忍與同列曾不羞耻蓋指說也帝覽之不懌遂得下第教授廣德軍除勅令所刪定官光宗立擢校書郎寧宗即位韓侂冑方用事指正人為偽學異論

者立黜遂求外除提舉福建常平陞辭言今除授
命令徑從中出而大臣之責輕諫省經筵無故罷
去而多士之心惑或者有以誤陛下至此侂冑間
之不悅遂為御史劉德秀劾罷奉祠者八年起吏
部員外郎遷國子司業兼權中書舍人侂冑既誅
餘黨尚塞正路幼學次第彈繳竄黜尤衆遷中書
舍人兼直學士院除吏部侍郎仍兼職趙師霁除
知臨安府幼學言師霁媚權臣進官三尹京兆狼
籍無善狀詔必出褒語臣何辭以草命遂寢除福
建路安撫使召權兵部尚書兼太子詹事先是朝
廷歲幣入金值有難不果納則遽以兵叩邊胥言
當亟與幼學言玉帛之使未還而侵軼之師奄至
天怒人憤可不伸大義以破其謀乎於是朝論奮
然始詔與金絕幼學因請固本根以弭外虞示意
向以定衆志公汲引以合材謀審懷附以一南北
帝稱善一夕星隕於屋西南遂卒幼學器質凝重

終日危坐一語不妄發及辨論義理如決江河嘗
續司馬光公卿百官表年厯大事紀備忘辨疑編
年政要列傳舉要凡百餘篇萬厯溫
州府志諡文懿子籥節範俱為名臣

蔡必勝

兩浙名賢錄字直之平陽人乾道初中右科
第一授江東將領召試為閤門舍人倖臣曾

觀方用事冀其過已必勝故不往出知邵州陞辭
論擇方面人才為天下大計孝宗異之曰觀卿儀
表非俗前程未可量也光宗在東宮聞其不見曾
觀歎息言必勝固是佳士及即位擢知閤門事光
宗病不能喪必勝與趙汝愚定議立寧宗韓侂胄
方規專權忌之出知廬州既鎮淮右遂議浚肥河
造戰船大張聲勢以基遠圖侂胄益忌之擢吉州
刺史奉祠卒必勝為政能救人疾苦審事利病條
畫修廢先後以倫其忠孝慈良根
於天性故凡所立皆得其大者

葉適

宋史本傳字正則永嘉人淳熙五年進士除太常博士嘗薦陳傅良等三十四人後皆召用會

朱熹為侍郎林栗所劾適上疏爭之疏入不報光宗嗣位由祕書郎為尚書左選郎官時帝以疾不朝重華者七月事皆廢不行適力言之上兩詣重華都人懽悅適復奏自今宜於過宮之日令宰執侍從先詣起居異時兩宮聖意有難言者自可因此傳致不可復使近習小人增損語言以生疑惑不報及孝宗不豫光宗不能執喪適曰上疾而不能執喪將何辭以謝天下今嘉王長若預建叅決則疑謗釋矣宰執用其言同入奏立嘉王為皇太子帝許之俄得御批有歷事歲久愈欲退閒之語人心愈搖樞密趙汝遇憂危不知所出適告知閤門事蔡必勝與傅昌朝關禮韓侂冑三人定計亟白汝愚以內禪議太皇太后許之翌日嘉王即帝位百官班賀中外晏然凡表奏皆汝愚與適裁定

遷國子司業而侂冑恃功怨望適歎曰禍自此始矣遂力求外秩為御史胡紘所劾降兩官罷主管冲佑觀起知泉州召對言治國以和為體處事以平為極臣欲人臣忘已體國息心既往圖報方來可也帝嘉納之初侂冑患人不附創偽學之名舉海內知名士貶竄殆盡後侂冑亦悔故適奏及之自是禁網漸解除權兵部侍郎會詔諸將四路出師適又告侂冑宜先防江不聽未幾諸軍皆敗侂冑懼除適知建康府兼沿江制置使金兵大入適募人刼營俘馘以歸解和州圍進寶文閣待制兼江淮制置使措置屯田遂上堡塢之議度沿江地創三大堡石跋則屏蔽采石定山則屏蔽靖安瓜步則屏蔽東陽下蜀西護漂陽東連儀真三堡就流民漸歸侂冑誅中丞雷孝友劾適附侂冑遂奪職奉祠凡十三年卒贈光祿大夫諡忠定萬歷溫州府志學者稱水心先生有習學記言荀揚問答

外稿水
心集

曹叔遠

宋史本傳字器遠瑞安人紹熙二年進士為國子學錄忤韓侂胄罷通判涪州後守遂寧

營卒莫簡稱亂勢張甚入遂寧境輒戡其徒無肆暴曰此江南好官員也後入朝權吏部侍郎遇事

獻替多所裨益終徽

獻閣待制謚文肅

曹邇

宋史本傳字西士叔遠族子嘉泰二年進士擢祕書丞出為浙西提舉常平面陳和糴折納之

弊召為左司諫與王萬郭磊卿徐清叟俱負直聲時號嘉熙四諫進禮部侍郎終寶章閣待制謚文恭

林畧

宋史本傳字孔英永嘉人慶元五年進士累遷左司諫兼侍講告帝曰虛心以為從諫之本從

諫以為求治之本嘉熙二年同簽書樞密院事以資政殿學士致仕

趙立夫

兩浙名賢錄字德成樂清人登開禧第調龍泉簿累遷大理寺正出知湖州改嚴州儲粟

備荒最聲上徹進太府卿兼知臨安府入對理宗語之曰京師細民當一意撫摩使常在春風和氣中遂於府西建春和樓推廣德意奉祠去起為浙西提刑兼守平江有旨和糴立夫奉詔糴二百萬斛不擾而辦二年復以戶部侍郎兼京尹郡民聞之皆喜曰我輩又在春風和氣中矣尋除刑部尚書授龍圖閣待制提舉萬壽宮進寶謨閣直學士

周端朝

萬歷溫州府志字子靖永嘉人行已族孫少淹貫經史為葉適所知繼從朱子於武夷學

業益進紹興中入太學趙汝愚罷相端朝與同舍生楊宏中等上疏救之得罪羈信州久之放免時

號六君子登嘉定第調桂陽軍教授首立濂溪祠以示準的改太學錄遷博士入對言人主之學與士大夫不同士大夫一心之存亡繫一身之是非人生一念之操舍關天下之休戚遷祕書少監兼侍讀乞廣收召以備其選於是蔣重珍徐清叟葉味道相繼進用除權刑部侍郎卒諡文忠

陳峴

兩浙名賢錄字來東平陽人中宏詞科歷除禮部郎祕書少監兼中書舍人坐不肯草蘇師旦節度使制免明年起知廣州修城濬濠置勇敢軍以壯聲勢峴寇不敢作徙知泉州召為兵部侍郎

未至

卒

陳昉

兩浙名賢錄字叔方峴子以父任入官知浦城縣盜起鄰郡昉措置得宜迄不犯境繼而老弱阻飢極力賑救境內以安真德秀薦之朝與劉克莊等號端平八士遷司農丞進直煥章閣樞密副

承旨權吏部侍郎丐去知福州重士愛民咸惠兼至蠲宿逋却例冊去郡之日帑庾充牣閩人論良牧必以昉為首名為工部侍郎景定初以寶章閣待制知建寧府屬邑產禾一本四十餘穗人以為善政所感除吏部尚書拜端明殿學士提舉祕書省致仕卒諡清惠

王持叟

兩浙名賢錄字載仲樂清人選入太學有聲嘗率六館叩閣論史嵩之登淳祐進士第入

浙西帥幕時有薦丁大全可任臺諫者持叟謂其內懷奸狡外示狂妄使其得志必為國家憂大全聞之憾焉未幾以著作兼左曹郎吳潛罷相持叟輪對言於理宗曰宰相進退人材當進賢退不肖不當以用舍快恩讎潛貶持叟上疏力爭之不聽遂罷歸賈似道怨潛甚疑持叟黨潛併惡之由是十五年間三擢不越郎曹二典皆不終似道敗始除大理少卿未上卒

陳力修

萬厯温州府志字介翁平陽人登紹定第厯除浙西提刑海寇蘇阿六積暴前使者置不

問力修設計授吏擒之正其罪浙右震悚除祭酒兼中書舍人面對言揆路蔽賢之罪理宗大悟會戚里有以濫恩驟進者格其命遂奉祠去盜起荻浦朝廷召畀憲節往諭盜聞風潰去久之復請祠歸

周元龜

温州府志字錫疇平陽人登嘉熙第厯江淮諸司幹官開慶間提轄左帑時太學六士叩

閤時相怒其攻已欲去之將以元龜為諫官諷以意元龜正色曰臺諫天子耳目不可以市私恩直士國家元氣不可以報私忿遂被劾除主管官誥院未幾委買江東限田元龜曰熙寧間海內無事王安石以新法騷動釀成不忍言之禍普天莫非王土未聞瘠子以肥父而家可為者又被劾去

明

黃淮

獻徵錄字崇豫永嘉人洪武丁丑進士除中書舍人永樂元年命為左庶子兼侍讀嘗有告黨

逆者淮曰洪武末年已有勅禁革不宜復舉從之大獄遂息靖難師後吏部例以南人官北土不効順者奏編行伍淮曰近者有勅旨征討官與舊官同一體若復追罪南人與勅旨相背上即罷之阿魯台既納款欲收土番諸部聽其約束請朝廷刻誓詞於金錠集諸部長磨酒飲之以盟淮曰諸部各自為心則力易制若併為一則愈難為矣豈可墮其奸謀上顧左右曰黃淮如立高岡無遠不見爾輩如立平地所見惟目前耳至於讞疑獄議鈔法其識見尤為人所不能及仁宗嗣位陞少保戶部尚書兼武英殿大學士宣德初以疾乞歸

湯宗

分省人物考字正傳平陽人由太學生歷遷刑部郎中永樂初擢蘇州知府坐事左遷用薦召

授大理寺丞時外夷貢使病死從人謂醫殺之獄成宗閱牘數曰夷人於醫素無仇怨寧有故殺之理卒辨其誣仁宗蒞政進左少卿陞南大理寺卿宣宗嗣位命清理戎籍於山東時天久不雨宗極陳民間飢饉貧困之狀請免租稅蠲徭役罷不急之務帝皆從之尋召還卒

陳奎

萬厯温州府志字秉文平陽人永樂進士歷禮部主事工部都水郎中嘗疏解太僕陳沛馬政

之譴蠲逋戶以萬計正統初議額森桀驁勢必犯順宜於河套等處增城堡以防馳突至己巳果有土木之變又論中貴王振之黨王山彭得清以救侍講劉球廷論壯之

章綸

吾學編字大綸樂清人正統己未進士景泰初為儀制郎中屢有論建懷獻太子卒人心危懼

御史鍾同諷禮部請復立沂王東宮綸亦疏言上皇君臨天下十有四年陛下親為臣子朔望節旦請率羣臣朝見延和門復汪后於中宮以正壺儀復沂王於東宮以定國本帝見疏大怒下詔獄炮烙煅鍊迫綸引大臣及通南城狀體無完膚竟不承乃錮禁獄中天順初首詔出獄拜禮部右侍郎二年山東大水民飢守臣請免田租不允綸再請得減十五尋改南京吏部成化十二年請老卒特贈尚書

諡恭毅

章元應

萬厯溫州府志字順德綸子成化乙未進士任南京禮工二科給事中慷慨敢言有父風

孝宗初嘗按劾中官汪直并其黨陳鉞疏救邊臣馬文升薦王恕邱濬楊守陳何喬新堪任宰輔時論偉之累官廣東布政使卒

高友璣

萬厯溫州府志字蕭政樂清人弘治庚戌進士以刑曹出守九江治為十三郡最時田州

土官岑猛作亂廷簡有幹局達權變者官其地遂陞廣西叅政管田州府事單車入境諭以順逆禍福不煩兵而款束聽命擢陝西布政使尋為副都御史巡撫大同以抑貴幸坐致仕用薦起為總督漕運副都御史誅江淮鹽徒首惡宥其脅從旋晉南京刑部尚書謝病歸卒贈太子少保諡襄簡

王讚

萬厯溫州府志字思獻永嘉人弘治丙辰進士授翰林院編修正德丙寅陞侍講充經筵講官

進講舉直錯枉章舉宦官宮妾以諷微指逆瑾瑾怒捏旨詰責遷國子司業瑾誅進南祭酒講明正學著四書五經誠敬等箴改北祭酒擢禮部侍郎時車駕數巡幸儲位久虛乃疏請育宗室一人於官中并乞回鑾語甚切直以母憂歸尋卒贈禮部尚書諡文定

陳璋

獻徵錄字宗獻樂清人弘治乙丑進士授刑部主事曰士不讀書謂之廢學官不讀律謂之曠

官乃研求法意至忘寢食律有疑難親為註解遂以法家名歷員外郎中奉勅審錄八閩所活不下百餘人事竣還京適武宗欲南巡上疏諫止廷杖五十伏枕五月而後起世宗嗣位陞大理寺卿時錦衣捕獲羣盜數十人中有十二人實平民也送大理審璋曰答一臧獲不當其罪人且得而議之況置十二人於非命乎具奏釋之繼為刑部左侍郎有上官以非法杖死下吏下法司獄或欲貸之璋曰殺人抵罪官與民一也固執不可忤執政意即乞致仕歸

張孚敬

舊浙江通志字茂恭永嘉人初名璉成進士世宗以興獻世子入繼大統下廷臣議所以

尊崇興獻王及后者久之不決孚敬乃上言皇上以武宗弟入繼武宗統非繼武宗嗣也書上大

不喜出為南京刑部主事時議尊孝宗為皇考興
獻帝為本生父字敬復上疏力爭言獻帝得稱考
不得稱本生孝宗當稱伯考不得稱考因上所著
或問二篇帝大悅超拜翰林院學士明年以侍郎
攝都御史平反妖人李福達獄晉都御史以禮部
尚書兼文淵閣大學士輔政中貴自武宗以來累
橫久字敬數為帝言中貴奸惡狀帝乃悉裁革鎮
守監鎗市舶之類後先殆盡弊政盡革字敬以言
禮貴於禮多所釐定如分祭南北郊正先師號易
像而主錄開國勲皆相業之表表者張鶴齡之外
戚寵衰為無賴所訐罪當族字敬力爭之終字敬
世得長繫字敬為相守己以正有賢能稱卒贈太
師諡

文忠

王諍

萬厯溫州府志字子孝永嘉人嘉靖庚戌進士
授溧陽令論最擢山東道御史巡鹽河東尋按

雲南沐黔國肆毒一方按法繩其家屬沐懼餌黃金三百兩拒不納陞大理少卿會議大獄據律駁其誤疏奏帝是其議且著為令晉僉都御史巡撫貴州會宣慰安國亨戕殺嫡叔總兵官請討敗績諍上疏自劾有旨回籍

李光春

溫州府志字元甫樂清人徙居永嘉萬厯丙辰進士任廣信府推官沐黔國遣官展祭遠

祖因奪國產併朱子懷玉書院光春撻其官牒上撫按悉返所奪產譽震於朝擢御史彈擊不避權貴逆璫魏忠賢擅政會大雨雹光春抗疏極論忠賢罪惡迂旨奪俸尋左遷九江兵備崇禎朝游厯福建江西河南藩臬所至著實績晉協理院事左僉都御史署院篆臺臣王聚奎劾陳啟新絨嘿溺職啟新方用事疏入下聚奎議處光春力為申救遂罷歸

周應期

永嘉縣志字克昌永嘉人萬厯己未進士授禮部郎中魏璫柄國令改幸學儀注執不可

黨人銜之出為福建兵備值海逆倡亂調度兵食秘授方畧降其衆十餘萬厯晉右副都御史理屯京東會遣十監臣分鎮畿輔應期力疏諫止致政後杜門不出者十九年

陳堯言

溫州府志字汝則永嘉人萬厯己未進士授行人持節使趙楚二藩餽遺悉無所受崇

禎朝擢南戶科給事中值南儲告匱京軍十數萬衆譟正陽門堯言以陵寢重地飛章奏請得給各衛旗船漕米二十餘萬石六軍懽呼尋為忌者所中出補陝西叅議至中途嬰疾乃繳勅歸

處州府

宋

詹適

括蒼景紀字德遠縉雲人性至孝廬墓有靈芝之瑞嘉祐四年進士為御史臺主簿以直名出

知漢陽婺越鄂鄆五州累官龍圖

閣學士居官廉正所至多有惠愛

管師仁

宋史本傳字元善處州龍泉人第進士知建昌軍有善政擢左司諫河北濱棣諸州歲被

水患民流未復租賦故在師仁請蠲減以綏徠之一方賴其賜遷工部侍郎擢刑部尚書以樞密直

學士知定州時邊備不整而遼使再至為西人請侵疆師仁下令增陴浚隍繕葺甲冑轉盼迄成外

間無知者而日與賓客燕集示閒暇使敵不疑名為同知樞密院才兩月卒

王信

宋史本傳字誠之麗水人紹興三十年進士授太學博士轉對言敵情不可測和議不可恃權

考功郎銓曹遂清邈者私相語指為神明陞左右司員外郎轉對論朝廷有恤民之政而州縣不能

行恤民之實又言屯田利害上皆納之遷太常少卿兼權中書舍人假禮部尚書使金歸言金人必衰之兆有四在我當備之策有二上首肯之宦者甘昇既逐俄提舉德壽宮信亟執奏學士洪邁適入上語之曰王給事論甘昇甚當特太上皇后以小黃門空多類不習事獨昇可任責以是駁疏不欲行卿見王給事可道此意信遇事剛果論奏不避權要人多嫉之信亦力求去提舉崇福宮起知湖州據案剖析敏如流泉擢知紹興府浙東安撫使奏免通官錢十四萬絹七萬疋綿十萬五千兩米二十萬斛山陰境有英猱湖四環皆田歲苦潦信創啟斗門導停瀦注之海築十一壩化滙浸為上腴民繪像以祠更其名曰王公湖疾作請老以通議大夫致仕

陳嘉猷

括蒼彙紀字猷可慶元人登紹興神童科累官禮部尚書公忠耿介有經濟大畧朝紳爭

重之

葉翥

括蒼彙紀字叔羽景寧人紹興甲戌進士累遷戶部長貳前後凡八年時會稽和買視他郡為

重民甚苦之翥奏蠲三萬餘匹慶元間除同知樞密院事以觀文殿學士致仕

蔣繼周

兩浙名賢錄字世修青田人登紹興進士第歷館職二十餘年奏對論事剴切孝宗稱之

曰卿文大似陸贄尋擢左司諫知無不言

歷御史中丞禮部尚書卒贈少師謚文恭

張貴謨

兩浙名賢錄字子智遂昌人第進士知江山縣光宗即位投匭進書極言民力已窮邦本

不固凡科歛之繁宜一切罷去以廣維新之澤幾萬餘言轉朝奉郎輪對數陳民間疾苦一十八條光宗嘉納之除司農寺丞時西浙旱災毘陵尤甚遂出知州事蒞任講行荒政飢民賴以全活者五

十萬除吏部員外郎陞郎中使金還論內修外攘之備轉朝散大夫會行郊禮極言郊赦為小人之幸不可為常帝可其奏未幾奉祠歸里以磨勘轉朝議大夫封遂昌縣開國男

何琮

括蒼彙紀字宗玉松陽人授吉州安福簿大書門屏曰以儉養廉將勤補拙入朝除左正言轉

殿中侍御史先此臺諫多為宰相私人有彈劾先進副封琮獨守舊法斥貪逐佞多合清議與相意忤改為起居舍人一日諷琮駁陳垾除命答曰琮他日尚欲附善類相怒即日左遷福建轉運副使後召入為戶部侍郎卒

王唐珪

括蒼彙紀字廷玉松陽人淳祐元年進士授紹興府法曹差尚書省檢閱官分守平江未

幾攝監察御史上封事言守令不職由宰輔奸邪罔上所致賈似道怒諷御史陳堅彈罷之

趙順孫

黃潛趙順孫字和仲縉雲人淳祐十年進士除祕書省正字咸淳改元為祕書郎兼

崇政殿說書因進講言今茲建元伊始正治亂相承之機度宗竦聽擢監察御史歷進侍御史兼侍讀時帑藏朽乏宮掖汰侈順孫疏奏者八面奏者三又累疏乞召洪天錫陳宗禮還居言職劾龔日升昏鄙不宜為察官他所薦何基呂大圭等十數人多朝廷宿望度宗皆嘉納謝堂以從官導旨樞庭出入宮禁權傾中外順孫奏外戚用事漢祚中微長此不已禍有不可勝言者歷疏其奸卒免堂官賈似道以太傳平章軍國重事順孫力陳其買田變楮之弊乞討論之似道不悅遂以顯文閣待制知平江府兼淮浙發運使先是郡庾赤立率以夏初徵民租順孫謂古者十月納禾稼今先期半載民何以堪首以俸入及例卷所供助糴米而抑浮費以繼之糴幾二十萬斛迄免預徵復召陞吏

部尚書進同知樞密院事兼叅知政事自躋政地
數建守備之策似道自詭知兵終不以為意順孫
憂憤成疾卒

明

劉基

弇州史料字伯溫清田人少穎敏絕羣善經學
傍通天官陰符家言元末舉進士授瑞州高安

丞以廉節著尋與其長不合投劾歸方谷珍反海
上肆橫不可制山寇蜂起行省乃以都事辟基授
以兵基且撫且討寇悉平經畧使上基功僅以故
資遷總管府判基遂歸青田山中會高帝已下金
華定括蒼使以金帛來聘乃走金陵見上陳時務
十八策上大悅俄陳友諒傾國入寇勢張甚上欲
發兵禦之而衆恒擾不決基曰賊驕矣誘之深入
而伏兵微取之易易耳於是決策破友諒盡覆其

衆母喪告歸上於軍國有所謀輒馳書叩基基事
事條對皆中俄召還上問曰吾欲取陳友諒張士
誠而議者多謂士誠密通且富而弱宜先取若為
我策之對曰士誠自守者耳陳氏據上游稱帝此
不宜久蘊崇之取陳氏則士誠囊中物耳會友諒
攻圍洪都上遂率師逆擊之大戰於彭蠡湖基請
移軍湖口以金木相犯日決勝陳氏遂平上即位
擢御史中丞諸大典制皆基與李善長宋濂計定
時處州七縣糧當加於宋歲額五升上獨令青田
僅以五升為額曰令鄉里世世子孫頌劉伯溫也
上欲相中書左丞楊憲以問基對曰憲有相才無
相器問汪廣洋何如曰此褊淺殆甚於憲胡惟庸
如何曰用之債轅破犁犢也上曰吾固難之吾之
相無逾先生基曰臣非不自知第臣疾惡太甚又
不耐繁劇恐孤陛下恩後以病請告就醫青田明
年大封功臣手詔敘基勲伐封誠意伯召赴京師

命兼弘文館學士而胡惟庸已代廣洋為丞相基乃大感曰吾安敢希言驗即驗如蒼生何遂悵悵不樂屬疾卒疾革時以生平所習天文秘書封授子璉曰服闋亟上之母令後人習也又為一書大畧勸上修德省刑授其次子璟曰惟庸方在上之何益是不久必敗敗則上思我其時可密聞也洪武十三年上誅惟庸果思基言召其子璉拜功監丞遷江西右叅政早卒二十三年召璉子鵬復封誠意伯予世襲正德中追贈基太師諡文成

章濫

史槩字三益龍泉人弱冠從王毅游講正心修身之學壬辰斬黃寇犯境集里民為兵擊却之

石抹宜孫留濫議軍事盡平屬縣凡三授官辭不受結廬匡山自號匡山居士己亥王師克處州避入閩中高帝東帛來召與劉基葉琛宋濂同至建業入見問曰四海紛紛何時定乎濫對曰天道無

常惟德是輔不嗜殺人者能一之上悅擢僉營田
司事巡行江淮田差稅有等擢浙東按察僉事總
制胡深出師溫州詔溢還守處州餽餉無缺師旋
以總制事付深還所部遷湖廣僉事鎮撫回回怙
勢作威輕重人罪廉得狀坐以法既而胡深伐閩
陷沒處州震動陞浙東副使鎮之比至山寨多叛
溢宣布詔旨勒兵誅首叛者餘皆帖帖處州僉水
軍隸軍府役煩事擾奏設千戶專統之又奏免山
田稅海賊入寇溢拒戰破禽畧盡朱亮祖取溫州
軍中掠人子女溢悉搜出還其家處州糧額以軍
興加徵十倍言之詔從其舊拜御史中丞時廷臣
多尚嚴溢務存大體不屑屑細故或問之曰憲臺
百司之表當先養以廉恥使人不犯豈以搏擊為
能哉先是上從溢議令李文忠入閩溢子存道部
鄉兵萬五千人以從事平詔存道以兵從海道北
征溢持不可曰鄉兵農人耳始令征閩許事平歸

農今復調之是爽信也兵已入閩者俾還州里昔嘗叛逆之民籍為軍使北征一舉而恩威著上喜曰孰謂儒者迂先生其為朕一行比至母憂求守制不允遣子存厚還家治喪身理戎事兵既集命存道部領浮海北行再申前請許之居喪悲戚過度營兆宅親負土石感疾卒

薛希璉

獻徵錄字廷器麗水人宣德庚戌進士拜監察御史正統五年廷選憲臣分行天下舉備

荒之政希璉直江西所至以便宜剋奸弊廣儲蓄增築陂塘吏服而民賴之擢刑部右侍郎閩寇鄧茂七亂後郡縣凋弊希璉受命鎮撫其地撫輯人民既而殘寇羅丕復起調兵討之降者數萬計其負固不服者縱兵擊斬殆盡閩寇乃平以功陞刑部尚書

李崇

括蒼彙紀字宗楷縉雲人宣德進士為刑部主事歷郎中秩滿當遷宦者王振嫉不附已深抑

之或勸謁振答曰官可不倣名節不可汙卒不往振死起遷本部右侍郎巡撫廣西威惠並著謚人畏服土官黃琮殺嫡自立棠收琮寘獄論死時憲宗在東宮景帝欲易之立已子琮希旨建言得出獄陞都督棠因此致仕過嶺南歸閱衣篋中香草一束笈曰此非廣中物耶取投水中

陳詔 兩浙名賢錄字廷詢青田人宣德庚戌進士除監察御史遷四川按察副使時閩浙盜發溫處屠掠尤慘以詔素有經濟才拜僉都御史巡撫浙江詔至諭以利害不煩寸兵而諸寇悉平將論功崇爵一夕疾作卒於官先是郡省運金帛鉅萬犒軍委詔不問出入詔例給之羨餘即封還府藏一絲不染

虞瑤 兩浙名賢錄字邦瓊縉雲人第進士官給事中成化間以進言忤昭德宮下懿旨將置之死同

列為擊登聞鼓救免中貴盧永督採處州礦課外橫征礦戶率棄家而逃瑤抗論得罷時稱為真諫官累遷至兵

部侍郎卒

應檀

獻徵錄字子材遂昌人嘉靖丙戌進士授刑部主事惠安張某以贓敗下部客有為張私謁者

夜遣金七百峻拒之嚴駭如法遷知常州府適當定冊檀究極利弊詳定規畫丁據黃冊糧據實徵其所更賦役二法最為精善歷陞山東布政使擢兵部右侍郎提督兩廣軍務桂平等處猛獍雜處半為盜藪積五十年餘檀至諭以得意笑家屯馬江等劇賊悉款服惟七山諸寇怙亂自若檀親督精銳擊之賊敗衄棄巢走遂封其山籍其田廬蓄物令官兵屯住耕作焉捷聞賚金帛蔭一子謹按舊志於人物一門最為率畧約言其弊則有兩端有本非浙人而強為附會者如三國之陸績

欽定四庫全書

卷一百六十二

顧雍陸遜陸抗晉之顧榮陸機陸雲陸納陸玩本吳郡吳人而系以海鹽陳之徐騫徐陵本東海郟人而系以剡唐之陸元方陸象先本蘇州吳人而系以海鹽宋之唐介其父拱已徙江陵而猶系餘杭葉清臣本長洲人而系以烏程趙汝愚本餘干人而系以嘉興張昇本韓城人而系以開化葉夢得本吳縣人而系以松陽黃中本邵武人而系以平陽蔣猷本金壇人而系以鄞趙彥呐本彭州人而系以餘杭明之徐琦自其祖已徙寧夏倪謙倪岳自洪武初已徙上元孫繼魯自其高祖已徙雲南而猶系以錢塘戈瑄自其曾祖已遷景州嚴清自其五世祖已遷滇而猶系以嘉興李至剛自其父已遷華亭而猶系寧海此其籍貫不明之大畧也有人品卑下而曲為揄揚者如俞充之媚內侍而排司馬光季陵之附范宗尹而攻張浚何執中之附蔡京而排陳瓘鄭清之之附史彌遠而廢濟

王錢適之建斥孟后劉正夫之力主紹述梁汝嘉
之諂事秦檜潛說友之諂事賈似道朱熠之排斥
朝臣陳宜中之昏庸誤國皆昭著史傳而猶力為
贊揚至於明代公卿尤多冗雜甚有附和權相結
交閹人而徒以官闕崇高虛辭溢美此其是非失
實之大略也今依據史傳博采諸志凡遇立朝大
節有虧雖名位
甚崇槩從刪削

浙江通志卷一百六十二